

帙

C40
4514
136

C40-45-14

寶公刊上經諸大藏及有
家書置之武州紫雲山
後徵塔塔空窟中未
為學者不取許出院內
嵩山二世鐵十機謹誌



B 64853

大乘莊嚴經論卷第十一

無著菩薩造

覺分品第二十一之二

釋曰已說菩薩修習道分次說菩薩修習止觀偈曰

安心於正定 此卽名爲止 正住法分別

是名爲觀相

釋曰安心於正定此卽名爲止者謂心依正安而不見心非無正定而立止故是名止相正住法分別是名爲觀相者謂依正住分別法體是名觀相問此二

行云何修偈曰

普欲諸功德 是二悉應修 一分非一分

修有單雙故

釋曰普欲諸功德是二悉應修者若人遍欲求諸功德是人於止觀二行悉應修習如經中說佛告諸比丘若有所求云何令得諸比丘離欲離惡不善法乃至廣說諸比丘有二法應須修習所謂止觀一分非一分者一分謂或止或觀非一分謂止觀合問何故答修有單雙故單修者一分或止修或觀修雙修者非一分謂止觀合脩問此二行云何種差別復云何

業偈曰

能通及能出 無相亦無爲 淨土及淨果
是二卽爲業

釋曰此偈上半明種差別下半明業此二法在信行地名依止修若入大地復有四種差別一能通修謂入初地二能出修謂入乃至六地於彼六地出有相方便故三無相修謂入第七地四無爲修謂入後三地作功用修名有爲後三地不作功用故名無爲此五是種差別淨土者依後三地修淨土行淨果者作轉依行此二淨卽是彼業已說菩薩止觀次說菩薩

修習五種巧方便偈曰

自熟與成生 速果并作業 生死道不絕

說此爲五巧

釋曰五種巧方便者一自熟佛法以無分別智爲巧
方便二成熟衆生以四攝法爲巧方便三速得菩提
以懺悔隨喜請轉法輪生起勝願爲巧方便四作業
成就以二門爲巧方便二門者謂陀羅尼門及三昧
門以此二門能成就利益衆生業故五生死道不絕
以無住處涅槃爲巧方便問云何巧差別云何巧業
偈曰

菩薩巧無等 差別依諸地 能成自他利

說是名爲業

釋曰此偈上半明巧差別下半明巧業差別者此五
方便於諸菩薩最上無等何以故於諸地中不與二
乘共故是名差別業者能成就自身他身一切利益
是名爲業已說菩薩巧方便次說菩薩陀羅尼偈曰
業報及聞習 亦以定爲因 依止此三行
持類有三種

釋曰陀羅尼品類有三種一報得由先世業力得故
二習得由現在聞持力而得故三修得由依定力得

故問云何種差別偈曰

二小一爲大 一大復三種 地前與地上

不淨及淨故

釋曰二小一爲大者於彼三種品類中報得及習得應知此二爲小修得者應知此一爲大大復三種者於彼大種類中應知復有三種謂軟中上未入地菩薩所有爲軟以入不淨地菩薩所有爲中謂初七地入清淨地菩薩所有爲上謂後三地問云何業偈曰

應知諸菩薩 恒依陀羅尼 開法及持法

作業皆如是

釋曰此中應知諸菩薩依止陀羅尼恒開示妙法及常受持以此爲業已說菩薩陀羅尼次說菩薩起諸願偈曰

思欲共爲體 智獨是彼因 諸地卽爲地

二果亦爲果

應知差別三 種種大清淨 此業有二種

自利與利他

釋曰此二偈以六義分別諸願一自性二因三地四果五差別六業彼思欲相應共爲自性以智爲因諸

地爲地二果爲果謂卽果及未來果以諸願爲因心得遂故心遂者如心所欲皆成就故又以願力遊諸願果所謂身放光明口發音響乃至廣說差別有三種一種種謂信行地願如是如是欲得故二廣大謂入地菩薩十大願故三清淨謂後後諸地轉轉清淨乃至佛地極清淨故是名差別彼業二種一自利成就二利他成就是名爲業已說菩薩諸願次說菩薩修習三三昧偈曰

應知二無我 及以二我依 二依常寂滅
三定所行境

釋曰三三昧有三種所行一人法二無我是空三昧所行二彼二執所依五取陰是無願三昧所行三彼依畢竟寂滅是無相三昧所行彼三種所取體爲三種境界彼三種能取體爲三種三昧是名三三昧問三三昧名義云何偈曰

空定無分別 無願厭背生 無相恒樂得
彼依常寂滅

釋曰空定無分別者無分別義是空三昧義由人法二我不分別故無願厭背生者厭背義是無願三昧義由厭背我執所依故無相恒樂得彼依常寂滅者

樂得義是無相三昧義由樂得彼所依畢竟寂滅故
問三三昧云何起偈曰

應知及應斷 及以應作證 次第空等定

修習有三種

釋曰應知及應斷及以應作證者應知謂人法二無
我應斷謂二我執所依應證謂彼依畢竟寂滅次第
空等定修習有三種者此中爲知人法二無我故修
空三昧爲斷彼二執所依故修無願三昧爲證彼依
畢竟寂滅故修無相三昧已說菩薩修習三三昧次
說菩薩說四法憂陀那偈曰

如前三三昧 四印爲依止 菩薩如是說

爲利羣生故

釋曰四法印者一者一切行無常印二者一切行苦
印三者一切法無我印四者涅槃寂滅印此中應知
無常印及苦印爲成無願三昧依止無我印爲成空
三昧依止寂滅印爲成無相三昧依止菩薩說此四
印爲三三昧依止皆爲利益諸衆生故問何等是無
常義乃至何等是寂滅義偈曰

無義分別義 不真分別義 息諸分別義

是名四并義

釋曰此中說菩薩以無義是無常義由分別相畢竟常無故以分別義是無我義由分別相唯有分別此二是分別相由無體故不真分別義是苦義由三界心心法爲苦體故此是依他相息諸分別義是寂滅義此是真實相復次應知依他相復以剎那剎那壞爲無常義問云何成立剎那壞義偈曰

由起及從因 相違亦不住 無體與相定

隨轉并滅盡 變異因亦果 執持與增上

隨淨及隨生 成義有十五

釋曰此二偈以十五義成立剎那剎那滅義一由起

二從因三相違四不住五無體六相定七隨轉八滅盡九變異十因十一果十二執持十三增上十四隨淨十五隨生由此十五義剎那壞義可得成立第一由起者諸行相續流名起若無剎那剎那滅義而有諸行相續流名起者不然若汝言物有暫時住後時先者滅後者起名相續者則無相續由暫住時後起無故第二從因者凡物前滅後起必藉因緣若離因緣則無體故若汝言彼物初因能生後時多果者不然初因作業卽便滅盡豈得與後諸果作因若汝言初因起已更不起者建立此因復何所用若汝言起

已未滅後時方滅者彼至後時誰爲滅因第三相違者若汝復執是能起因復爲滅因者不然起滅相違同共一因無此理故譬如光闇不並冷熱不俱此亦如是是故起因非卽滅因若如汝執諸行起已非卽滅者則違阿含及道理違阿含者佛語諸比丘諸行如幻是壞滅法是暫時法剎那不住違道理者諸修行人於諸行生滅中思惟剎那剎那滅若不如是於臨終時見彼滅相則無厭惡離欲解脫是則同餘凡夫第四不住者若汝言諸行起已得有住者爲行自住爲因他住若行自住何故不能恒住若因他住彼

住無體何所可因二俱不爾是故剎那剎那滅義得成第五無體者若汝執住因雖無壞因未至是故得住壞因若至後時卽滅非如火變黑鐵者不能壞因畢竟無有體故火變鐵譬我無此理鐵與火合黑相似滅赤相似起能牽赤相似起是火功能實非以火變於黑鐵又如煎水至極少位後水不生亦非火合水方無體第六相定者佛說有爲法有爲相一向決定所謂無常汝執諸行起已非卽滅者是有爲法則有少時而非無常便墮非一向相第七隨轉者若汝言若物剎那剎那新生者云何於中作舊物解應說

論
由相似隨轉得作是知譬如燈燄相似起故起舊燈
知而實差別前體無故第八滅盡者若汝言云何得
知後物非前應說由滅盡故若住不滅則後剎那與
初剎那住無差別由有差別故知後物而非前物第
九變異者若汝言物之初起非即變異者不然內外
法體後邊不可得故由初起即變漸至明了譬如乳
至酪位酪相方現而變體微細難可了知由相似隨
轉謂是前物以是故剎那剎那滅義得成第十因者
若汝許心是剎那滅彼心起因謂眼色等諸行彼果
剎那滅故因亦剎那由不可以常因起無常果故第

十一果者彼眼等諸行亦是心果是故剎那滅義得
成由不可以無常因起常果故第十二執持者若汝
言云何得知眼等諸行亦是心果應說由心執持得
增長故第十三增上者又如佛說心將世間去心牽
世間來由心自在世間隨轉識緣名色此說亦爾故
知諸行是心果第十四隨淨者淨是禪定人心彼人
諸行隨淨心轉如經中說修禪比丘具足神通心得
自在若欲令木爲金則得隨意故知諸行皆是心果
第十五隨生者如作罪衆生所得外物一切下劣作
福衆生所得外物一切妙好故知諸行皆是心果因

是剎那果非剎那無此道理由因自在故如是總成立一切內外諸行是剎那已次別成立內法是剎那偈曰

初起及續起

長起及依起

變起與熟起

劣起亦勝起

明起無明起

及以異處起

種起無種起

像起十四起

釋曰此二偈以十四種起成立內法諸行是剎那義一者初起謂最初自體生二者續起謂除初剎那餘剎那生三者長起謂眠食梵行正受長養故生四者依起謂眼等謂識依止眼等根生五者變起謂貪等

染汙令色等變生六者熟起謂成胎穉兒童子少壯中年老位等生七者劣起謂諸惡道生八者勝起謂諸善道生九者明起謂欲界後二天及色界無色界一切天生十者無明起謂除前明處所餘諸處生十一者異處起謂此處死彼處生十二者種起謂除阿羅漢最後五陰生十三者無種起謂前所除最後五陰生由後生種子無故十四者像起謂入解脫禪者定自在力故諸行像生問復以何因成立此十四種起偈曰

續異及斷異

隨長亦隨依

住過及去過

無住無無死 亦有隨心相 行者應當知
如此九種因 成前十四起

釋曰此二偈以九種因成立前十四起九種因者一
續異二斷異三隨長四隨依五住過六去過七無住
八有死九隨心第一續異者此因成立第一初起若
最初起時因體無差別者則後時諸行相續而起亦
無差別因體無差別故由因有差別故後餘諸行剎
那得成第二斷異者此因成立第二續起若一一剎
那無差別因者則後時斷差別亦不可得由斷有差
別故諸行剎那此義得成第三隨長者此因成立第

三長起能令諸行圓滿故名爲長若無剎那而有諸
行長養者不然由彼住故若諸行得住則不得漸大
圓滿非謂長養第四隨依者此因成立第四依起若
執能依不住所依得住者不然如人乘馬人去馬不
去無有此理如是識依於根識有剎那依無剎那不
然亦爾第五住過者此因成立六起謂變起熟起劣
起勝起明起無明起成立變起熟起者若執諸行初
起卽住不滅者不然無變起故謂貪等變色永不
得由初無變後亦爾故若初無變後諸熟位亦不可
得由先有變後方熟故成立劣起勝起剎那亦爾若

執諸行得住而有善惡熏習次第與果者不然諸行
不住次第相續各得與果此義可爾成立明起無明
起剎那亦爾若諸行得住則明起亦爾不住則有由
心轉故無無明起亦爾後時無變異故第六去過者
此因成立第十一異處起若執諸行往餘處名去者
不然我今問汝諸行去作爲起已將諸行往餘處爲
不起將諸行往餘處若起已將往者此處起已餘處
不起此卽是住而言去者是義相違若不起將往者
不起則本來無去而言去者此語無義又復若諸行
去作住此處卽作所作令諸行去是亦不然住則不

得到餘處故若諸行到餘處方所作是亦不然無
有離去而有諸行到餘處故若此處住若餘處住離
諸行外畢竟求作不可得是故不異諸行相續而有
去作去旣無體則剎那義成若汝言若實無去云何
世人見去應說由無間相續假說名去實無去體若
汝言復有何因諸行得相續去應說因緣無量有心
力自在如威儀等去有宿業自在如中陰中去有手
力自在如放箭擲石去有依止自在如乘車乘船去
有使力自在如風吹物去有自體自在如風性飭去
火性上去水性下去有術力自在如依呪依藥在空

而去有磁石自在能令鐵去有通力自在如乘通去如是等有無量因緣能令諸行相續假說名去是義應知第七無住者此因成立第十二種起若諸行得住餘時更有種子起者不然剎那剎那無餘因故若諸行不住後種子起是義不然第八有死者此因成立第十三無種起若無剎那而有死時無種起者不然先有種起後命終時方無種起是亦不然由一一剎那因無體故是故死心剎那不可得成第九隨心者此因成立第十四像起由心自在剎那剎那彼像得起若無剎那而像得起無此理故問如是別成立

內有為法剎那已復有何因能成立外法四大及六種造色是剎那耶偈曰

由滋及由涸 性動增亦減 二起與四變

薪力及漸微 亦說隨心起 及以難問成

一切諸外法 無非剎那體

釋曰此二偈以十四因成立外法是剎那水有二因一滋二涸若無剎那水或時滋長或時乾涸不可顯現若人作如是問既無剎那水有何因而滋復有何因而涸彼則不能答今見水有滋涸故知剎那是水滋涸因風有三因一性動二增盛三減息若風性住

則無動時行無體故亦無增盛亦無減息由彼住故
地有六因謂二起四變二起者由水由風地起可得
謂劫生時彼地是水風果故知地亦是剎那四變者
由四所作地變可得一業力所作由衆生業力有差
別故二人功所作由掘鑿等故三諸大所作由火水
風故四時節所作由時改轉異相現故若無剎那四
變不可得因無體故如地有六因知是剎那色香味
觸六因亦爾是故亦是剎那火有一因所謂薪力薪
力火增故火得起已共火起薪卽不得住火燒薪已
火亦不住若火不由薪後時無薪火應久住由隨同

義故火聲在後說聲有一因所謂漸微譬如鍾聲後
時漸微可得若無剎那後時小聲無可得理法入色
有一因謂隨心起如受戒時隨心中中上起心因剎
那故彼果亦剎那是故外法剎那亦成復次總由難
問故我今問汝何故欲得諸行無常不欲得諸行剎
那滅若汝言一一剎那滅不可知者不然譬如燈燄
於不動位彼剎那亦不可知汝何故不欲令彼體無
剎那若汝言燈燄體有剎那細故不可覺者諸行亦
爾何故不欲令有剎那若汝言燈燄與諸行不相似
者不然不相似有二種一自性不相似二時分不相

論
一
乘子論卷第十一
一
非
似若此自性不相似者此譬得成非自體爲譬故非
如以燈喻燈以牛喻牛譬則不成若取時分不相似
者此譬亦成由燈燄及諸行皆刹那相似故若非刹
那譬則不成今更問汝如人乘乘其乘住時其人去
不答不若爾者所依根住能依識去亦無道理若汝
言何故現見燈燄念念滅燈炷如是住應說汝見非
見由炷相續刹那刹那有壞有起汝不如實知故若
汝言諸行刹那如燈燄者世人何故不知應說由諸
行是顛倒物故相續刹那隨轉此不可知而實別別
起世人謂是前物生顛倒知若不爾則無無常常倒

倒體若無染汗亦無復從何處而有解脫由是難問
則諸行刹那成成立無常常義已次成立無我義問
人者爲可說有爲可說無偈曰

人假非實有 言實不可得 顛倒及染汗

染因成立故

釋曰人假非實有者可說人是假名有非實體有若
如此則不墮一向執離有無故問人是實有云何知
無答言實不可得由彼人不如色等有實可得非覺
智證故問人非覺智不證佛又說我者現在可得汝
言不可得者不然答此言可得非實可得由顛倒故

佛說無我計我是名顛倒問云何知是顛倒答由染汗故身見是染汗所謂我我所執若不顛倒則非染汗問云何知我執是染汗答染汗因故由我執爲因貪等染汗得起是故知是染汗問如汝所許於色等五陰說人假有此人與陰爲一爲異偈曰

假人與實陰 不可說一異 若說一異者 則有二過生

釋曰假人與陰不可說一不可說異若說一異二過則生二過者若說人與陰一陰卽是人及人是實若說人與陰異陰雖非人人亦是實以是故人是施設

有一異不可說是故如來止記論成偈曰

若執人是實 一異應可說 一異不可說 此說則無理

釋曰若人違大師教執有實人是實人與陰一異則應可說而執與陰一異不可說此說則無道理若汝言人不可說如火與薪非異非不異者不然偈曰

異相及世見 聖說亦不然 火薪非不說 有二可得故

釋曰異相者火謂火火薪謂餘大各有別相是故火與薪異世見者世人離火見薪謂可燒木等亦離薪

見火如風吹燄去是故火與薪異聖說亦不然者佛
世尊無處說火之與薪一異不可說是故汝執火薪
一異不可說此無道理若汝言非離薪見火風卽是
薪者不然有二可得故由火之與風二相別故復次
偈曰

二有故識起 人緣則非義 好滅及惡生

言生復非理

釋曰若人執人有實謂見者聞者覺者識者食者知
者說者若爾彼眼等識起爲以人爲緣說人是作者
爲以人是主說人是作者若以人爲緣者二有故識

起人緣則非義由人於識起中無有少力可見故若
以人是主者好滅及惡生言生復非理若人爲主已
生所愛識應畢竟令不滅不應令滅未生不愛識應
畢竟令不生不應令生以是故汝不應執人是見者
乃至識者復次偈曰

汝執實人中 何業可成立 無實強令實

違佛三菩提

釋曰若人是實有汝以何業可得成立凡是實有必
有事業如眼等淨色以見等事業可得成立人無是
等事業可得成立是故人非實有復次汝於無實人

中強欲令有實人卽違如來三種菩提一者甚深菩提二者不共菩提三者出世菩提若見實人則非甚深菩提則非不共外道菩提則非世間不習菩提是故此執是此間所取是外道著處是生死恒習復次若人是見者乃至識者眼等諸根爲有功用爲無功用若有功用爲自然起爲由人起問彼何所疑偈曰
若用自然起 卽有三過生 若以人爲緣

眼等則無用

釋曰若言眼等功用自然起者人於眼等不作事業則有三種過生若言以人爲緣功用得起者眼等諸

根則一向無有功用問何者是功用自然起三過偈曰

人非作者故 用非常起故 起非一時故

自起則不然

釋曰若眼等功用不待人作自然而起則人非作者云何名見者乃至識者此是第一過失若眼等功用自然起則應常起不應起時非常此是第二過失若眼等功用常起則起應一時云何不得並起此是第三過失由此義故若言自然起者不然問以人爲緣復有何過偈曰

論
人住用先無 人壞則人斷 更有第三體
爲緣無此義

釋曰若言人住與功用爲緣者人既常有何故功用先無後有是義不然若言人壞爲緣者人壞則墮無常是亦不然若言更有第三不住不壞人爲緣者無有此義如是依道理說實人不可得復次偈曰

諸法無我印 及說真實空 我有五過
是故知無我

釋曰法印經中佛說一切法無我真實空經中佛說有業有報作者不可得捨前陰起後陰起滅唯法增

五經中說若執有我有五過失一者墮於見處起我見命者見二者同於外道三者僻行邪行四者於空不欲不信不住五者聖法不得清淨如是依阿含說有實人亦不可得問若無實人云何世尊處處經中而說有人謂知者負擔者及建立隨信行等人耶偈曰

由依染淨法 位斷說有異 行異相續異
無實假說人

釋曰由依染汙法及清淨法有位差別及斷差別故建立假人有差別若無假人差別則不可說有行差

別及相續差別如知經中說何等諸法謂染汙法何等爲知謂清淨法如負擔經中說何者負擔謂染汙法何者棄擔謂清淨法若無行差別及相續差別則不可說此二法爲知者負擔者菩提分法多位差別謂方便道見道修道究竟道若無行及相續差別則不可說彼菩提分法有隨信行等人差別由無實人約法差別可得假說以此道理故知所說但是假人若佛意不說是假人說實人則無用由起衆生我見故偈曰

不爲起我見 由見已起故 無始已習故

無用應解脫

釋曰佛不應爲起衆生我見說有實人由衆生我見先已起故亦不爲令衆生數習我見說有實人由衆生我見先已習故亦不爲令我見衆生得解脫故說有實人一切無功用者皆應自然得解脫故以是故一切未見諦者有我見而無解脫非如苦體先時不見後時方見人不如是非先不見後時方見又如苦體先時不見後亦不見卽無解脫人體亦爾先時亦見後時亦見則無解脫若實有我則決定有我所從此二執卽起我愛及餘煩惱如是則無解脫以是故

不應欲得有實人以我見等過皆悉起故如是別說
菩提分已次總結前義偈曰

慙羞等功德 菩薩常具足 自利既不捨
亦令他利成

釋曰此義如前所顯略說覺分品究竟

大乘莊嚴經論卷第十一

音釋

櫻於京切 曷各切
小兒也 水竭也

大乘莊嚴經論卷第十二

無 著 菩 薩 造

唐三藏波羅頗迦羅蜜多羅譯

功德品第二十二

釋曰已說菩薩諸覺分次說菩薩諸功德偈曰

捨身及勝位 忍下亦長勤 不味不分別
六行說希有

釋曰此偈顯示行希有檀行者若能施自身命則爲
希有餘非希有戒行者若能棄捨勝位慕道出家則
爲希有餘非希有忍行者若能不顧身命忍於下劣

衆生則爲希有餘非希有精進行者若能長時正勤
乃至窮生死際而不斷絕則爲希有餘非希有禪行
者若能於勝定樂而不啾味不彼受生則爲希有餘
非希有慧行者若能起無分別智則爲希有餘非希
有若聲聞人分別四諦而有厭離菩薩則不爾是名
六種行希有偈曰

生在如來家 得記并受職 及以得菩提

四果說希有

釋曰此偈顯示果希有菩薩有四種果一者入初地
時生如來家是須陀洹果二者於第八地中而得授

記是斯陀含果三者於第十地中而得受職是阿那
含果四者佛地是阿羅漢果前三是學果第四是無
學果已說菩薩希有次說菩薩非希有偈曰

離欲與得悲 勝修及平等 依此修諸度
是行非希有

釋曰若菩薩已得離欲而行布施非爲希有不染於
物物易捨故若菩薩以得大悲而持戒忍辱非爲希
有若菩薩已得勝修謂第八地由無功用無分別故
行後三度非爲希有若菩薩已得自他平等心行一
切諸度亦非希有由利他時卽如自利無有退屈心

故已說菩薩非希有次說菩薩平等心偈曰

菩薩愛眾心 不同生五愛 自身與眷屬

子友及諸親

釋曰此偈顯示菩薩於諸眾生得平等心衆生有五種愛心不得平等一愛自身二愛眷屬三愛兒子四愛朋友五愛諸親由此五愛不得平等亦非畢竟如人或時亦行自害菩薩愛衆生心則平等由不捨不退故偈曰

無偏及無犯 遍忍起善利 禪亦無分別

六度心平等

釋曰此偈顯示菩薩行六度得心平等無偏者是布施心平等於諸求者不隨愛憎故無犯者是持戒心平等乃至微細戒行亦不缺故遍忍者是忍辱心平等普於勝劣衆生皆能忍故起善利者是精進心平等爲起一切善根及起自他一切種利而勤行故禪亦者是學定心平等菩薩修定亦爲起諸善根及爲起諸利益而精進故無分別者是修慧心平等從初發心乃至究竟所行諸度皆三輪清淨故是名諸度心平等已說菩薩平等心次說菩薩饒益衆生事偈曰

令器及令禁 耐惡與助善 入法亦斷疑

亦行饒益事

釋曰此偈顯示諸菩薩以六波羅蜜饒益諸眾生令器者以施饒益令彼得成修善器故令禁者以戒饒益隨其堪能而令持故耐惡者以忍饒益能受眾生違逆事故助善者以進饒益佐助眾心營善業故人法者以定饒益迴邪入正通力能故斷疑者以智饒益若凡若聖所有疑網皆除故已說菩薩六度饒益次說菩薩七似饒益一似母饒益二似父饒益三似善友饒益四似同侶饒益五似健奴饒益六似闍黎

饒益七似和尚饒益問云何似母饒益偈曰

等心生聖地 長善防諸惡 教習以多聞 五業如慈母

釋曰譬如慈母於子作五種饒益業一懷胎二出生三長養四防害五教語菩薩饒益眾生五業亦爾一等心向眾生二生之於聖地三長養諸善根四防護諸惡作五教習以多聞是名菩薩五種似母業問云何似父饒益偈曰

令信令戒定 令脫令勸請 亦為防後障 五業如慈父

釋曰譬如慈父於子作五種饒益業一下種子二教
工巧三爲娉室四付善友五爲絕債不令後償菩薩
五業亦爾一令起信以爲聖體種子二令學增上戒
定以爲工巧三令得解脫喜樂以爲娉室四令勸請
諸佛以爲善友五爲遮諸障礙以爲絕債是名菩薩
五種似父業問云何似善友饒益偈曰

秘深及訶犯 讚持與教授 令覺諸魔事

五業如善友

釋曰譬如善友於已作五種饒益業一密語爲覆二
惡行令斷三善行稱譽四所造佐助五遮習惡事惡

事四種一射獵二姦非三耽酒四博戲菩薩五業亦
爾一非器者秘其深說二犯戒者如法訶責三具戒
者以善稱譽四修行者教令速證五魔事者卽令覺
知是名菩薩五種似善友業問云何似同侶饒益偈
曰

與樂及與利 樂恒利亦恒 及以不離散

五業如同侶

釋曰譬如如有智同侶於已作五種饒益業一與樂二
與利三恒與樂四恒與利五不乖離菩薩五業亦爾
一與不顛倒樂世間成就者名樂由此得樂受故二

與不顛倒利出世成就者名利由此對治煩惱病故
餘三可解是名菩薩五種似同侶業問云何似健奴
饒益偈曰

成生開出要 忍害與二成 示以巧方便

五業如健奴

釋曰譬如健奴爲主作五種饒益業一極諸所作二
得不欺誑三忍諸打罵四作事精好五解巧方便菩
薩五業亦爾一成熟衆生二開示出要三忍諸惡事
四與世間樂五與出世利是名菩薩五種似健奴業
問云何似闍黎饒益偈曰

遍授及示要 舒顏亦愛語 不求彼恩報

五業如闍黎

釋曰得無生忍者說爲闍黎譬如闍黎於弟子作五
種饒益業一教其諸法二示其速要三身知舒顏四
口知愛語五心無希望菩薩五業亦爾應知問云何
似和尚饒益偈曰

令滿及令脫 斷障與世樂 及與出世利

五業如和尚

釋曰譬如和尚於弟子作五種饒益業一度令出家
二與其受戒三禁斷諸過四攝持以財五教授以法

菩薩五業亦爾一令滿二聚二令得解脫三令斷諸障四與世間樂五與出世利是名菩薩五種似和尙業已說菩薩七似饒益次說衆生六種報恩偈曰

不著及不犯 知作亦善行 如是修六度 是報菩薩恩

釋曰如菩薩饒益衆生衆生報菩薩恩亦如是不著者布施報恩不犯者持戒報恩知作者修忍報恩菩薩愛忍彼知而作卽是報恩善行者行餘三度報恩以精進行定慧卽得解脫故後三度合名善行已說衆生六種報恩次說菩薩五種希望偈曰

六增及六減 成生與進地 大覺是五處 希望有五種

釋曰諸菩薩於五處常起希望一希望六度增長二希望六蔽損減三希望成熟衆生四希望勝進諸地五希望無上菩提是名五種希望已說菩薩五種希望次說菩薩四種不空果偈曰

斷怖與發心 除疑亦起行 四事化衆生 必定不空果

釋曰諸菩薩四業利益衆生必不空果一爲說深法必得不怖二令發菩提必得佛果三爲之斷疑必無

重起四爲說六度必能修習是名四業不空果已說
菩薩四種不空果次說菩薩六種正行偈曰

離求離後有 遍起諸功德 修禪捨無色
智合方便行

釋曰離求者布施正行不望報故離後有者戒忍正
行不求後有故遍起諸功德者精進正行修禪捨無
色者禪定正行智合方便行者般若正行三輪清淨
爲般若廻向菩提爲方便如寶積經說施不求報如
是廣說已說菩薩六種正行次說菩薩六度進退分
偈曰

著財與毀禁 慢下將墮善 噉味亦分別
是退翻爲進

釋曰六度所對治是退分因翻彼所對治卽是能對
治應知卽是進分因已說菩薩六度進退分次說菩
薩六度真似功德偈曰

假許及詐相 誑喜亦僞勤 身靜口善說
是似翻卽真

釋曰假許者是似布施謂語求者言所有恣取而彼
來卽悖詐相者是似持戒謂覆藏諸惡而詐善威儀
誑喜者是似忍辱謂甘言虛悅而規害待時僞勤者

論
天乘正法經卷第二
非
是似精進謂虛說我求佛果而實心希世報身靜者是似禪定謂身口端默而惡覺擾心口善說者是似般若謂爲他巧說而身自不行此六是不真行翻此不真行卽爲真行已說菩薩真似功德次說菩薩爲衆生除六蔽偈曰

與彼六度行 除彼六蔽障 菩薩化衆生
地地皆如是

釋曰衆生有六蔽能障彼六波羅蜜所謂慳貪破戒瞋恚懈怠亂心愚癡菩薩如其次第給其所須令行布施乃至令行般若使彼衆生得除六障卽是與施

乃至與智已說菩薩除衆生六蔽次說諸佛授菩薩記偈曰

授記有二種 人別及時別 轉記及大記
此復爲二種

釋曰授記有二種一人差別二時差別人差別授記有四種一未發心授記謂性位二已發心授記三現前授記四不現前授記時差別授記有二種一有數時授記二無數時授記復次更有二種授記一轉授記二大授記轉授記者謂記彼菩薩後於如是如來如是時節當得授記問云何大授記偈曰

八地得無生 斷慢斷功用 諸佛及弟子
一體同如故

釋曰大授記者謂在第八地中得無生忍時由斷自言我當作佛慢故及斷一切分別相功用故得一切諸佛菩薩同一體故問云何同一體答不見諸佛諸菩薩與自己身而有特別何以故同一如故偈曰
刹土及名號 時節與劫名 眷屬并法住

記復有六種

釋曰復有此六種授記一者於如是刹土二者有如是名號三者經如是時節四者有如是劫名五者得如是眷屬六者如是時節正法住世已說諸佛授記
次說菩薩六種決定偈曰

財成及生勝 不退與修習 定業無功用
六事決定成

釋曰菩薩由六度增上得六種決定一者財成決定由施常得大財成就故二者生勝決定由戒常得隨意受生故三者不退決定由忍諸苦常不退故四者修習決定由進恒時習善無間息故五者定業決定由禪成就衆生業永不退故六者無功用決定由智得無生忍無分別智自然住故已說菩薩六種決定

次說菩薩六種必應作偈曰

供養及學戒 修悲亦勤善 離誼深樂法

六事必應作

釋曰諸菩薩爲成就六度故於諸地中決定應作六事一者必應供養此爲成就檀度若不長時供養則檀度不得圓滿供養義如供養品說二者必應學戒此爲成就戒度若不長時學戒則戒度不得圓滿三者必應修悲此爲成就忍度若不長時忍諸不饒益事則忍度不得圓滿四者必應勤善此爲成就進度若心放逸不修諸善則進度不得圓滿五者必應離

誼此爲成就禪度若在聚落多諍擾心則禪度不得圓滿六者必應樂法此爲成就智度若不遍歷諸佛聽法無厭如海納流無時盈溢則智度不得圓滿已說菩薩六種必應作次說菩薩六種必常作偈曰
厭塵及自省 耐苦修善法 不味不分別

六行必常起

釋曰諸菩薩爲成就六度故必應常作六事一者厭塵謂知五欲過失譬如糞穢雖少亦臭布施果報雖多亦苦由不著故能行三施此事常修則檀度圓滿二者自省謂晝夜六時常自省察所作三業知過則

改此事常修則戒度圓滿三者耐苦若有他來作諸
不饒益事及自求法忍諸寒熱等苦此事常修則忍
度圓滿四者修善善謂六波羅蜜於諸地中此事常
修則進度圓滿五者不味謂不啜禪中勝樂恒來欲
界受生此事常修則禪度圓滿六者不分別謂於三
輪異相不起分別此事常修則智度圓滿已說菩薩
六種必常作次說菩薩六度勝類偈曰

法施及聖戒 無生起大乘 定悲如實智

六行此爲勝

釋曰施有多種以法施而爲最上戒有多種以聖人

所愛無流戒而爲最上忍有多種以八地無生忍而
爲最上精進有多種以起大乘度脫衆生而爲最上
定有多種以出世第四禪與大悲合者而爲最上智
有多種以如實通達諸法智而爲最上已說菩薩六
度勝類次說四種假建立偈曰

立法及立諦 立理亦立乘 五七四三種

建立假差別

釋曰四種假建立者一法假建立二諦假建立三道
理假建立四乘假建立問各有幾種答法假建立有
五種差別諦假建立有七種差別道理假建立有四

種差別乘假建立有三種差別法假建立五種者偈

曰

所謂五明處 皆是大乘種 修多祇夜等
類有差別故

釋曰法假建立五種卽是五明論此五皆是大乘修
多羅祇夜等種類差別五明處如覺分品說諦假建
立七種者偈曰

輪轉及空相 唯識與依止 邪行亦清淨
正行如七種

釋曰七種差別卽是七如一輪轉如二空相如三唯

識如四依止如五邪行如六清淨如七正行如輪轉
如者謂生死卽是三界心心法此從分別起此分別
復從因緣起不從自在等因生亦非無因生由分別
境界空故一切時但有分別依他二性輪轉空相如
者謂法無我一切諸法同一空如以爲相故唯識如
者謂無分別智依止如者謂苦諦此有二種一器世
間二衆生世間邪行如者謂集諦此卽是愛清淨如
者謂滅諦此有二種一煩惱障淨二智障淨正行如
者謂道諦如此七種如名諦假建立此中應知三種
如是分別依他二性謂輪轉如依止如邪行如四種

如是真實性謂空相如唯識如清淨如正行如故分別依他二性攝者卽是世諦真實性攝者卽是真諦道理假建立四種者偈曰

正思正見果 擇法現等量 亦說不思議
道理有四種

釋曰道理假建立有四種一相待道理二因果道理三成就道理四法然道理相待道理者所謂正思由待正思出世正見方始得起離正思惟更無別方便故因果道理者所謂正見及果成就道理者所謂以現等量簡擇諸法法然道理者所謂不可思議處此法已成故如問何故正思能起正見此已成就不應更思何故正見能斷煩惱及得於滅此已成就不可更思諸如是義悉是法然道理如此四種名道理假建立乘假建立三種者偈曰

心說行聚果 五各下中上 依此三品異
建立有三乘

釋曰依五義三品建立三乘五義者一心二說三行四聚五果三品者謂下中上若聲聞五事俱下心下者求自解脫說下者說自利法行下者行自利行聚下者福智陞小但三生等果下者得聲聞果若緣覺

乘五事俱中若菩薩乘五事俱上心上者謂四種恩
心如金剛般若經說說上者如其恩心作如是說法
行上者如其說法作如是行行聚上者如其行行得
如是聚滿果上者如其聚滿得無上菩提復次若聲
聞乘從他聞法內自思惟以分別智得果若緣覺乘
不從他聞內自思惟亦以分別智得果若菩薩乘不
從他聞以無分別智得果此三種名乘假建立已說
四種假建立次說菩薩四種求知偈曰

名物互爲客 二性俱是假 二別不可得
是名四求義

釋曰諸菩薩四種求諸法一名求二物求三自性求
四差別求名求者推名於物是客此謂名求物求者
推物於名是客此謂物求自性求者推名自性及物
自性知俱是假此謂自性求差別求者推名差別及
物差別知俱空故悉不可得此謂差別求說四求已
次分別四如實知偈曰

眞智有四種 名等不可得 二利爲大業
成在諸地中

釋曰諸菩薩於諸法有四種如實知一緣名如實知
二緣物如實知三緣自性如實知四緣差別如實知

如實知者由知一物名等皆不可得故二利爲大業成在諸地中者諸菩薩於諸地中起自利利他大事此名如實知業偈曰

住持及受用 種子合三因 依止及心法

亦種爲彼縛

釋曰三因者一住持因二受用因三種子因住持因者謂器世界受用因者謂五欲境界種子因者謂阿梨耶識由此識是內外諸法種子因故此三因如繩卽是能縛問此縛縛何等物答依止及心法亦種爲彼縛所縛亦有三種一依止二心法三阿梨耶識問

依止是何等答是眼等六根問阿梨耶識是何等答是三界內外諸法種子此中但有阿梨耶識可縛無人我可縛此名如實知繫縛偈曰

安相在心前 及以自然住 一切俱觀察
至得大菩提

釋曰安相在心前者安相謂聞思修慧方便人所緣起分別故名安相及以自然住者彼相謂自性現前非分別故名自然住一切俱觀察者彼二所緣非所緣體無分別故以此方便爲諸相對治彼二應次第觀察謂先觀安相後觀自然住相此二皆非緣體彼

起四倒卽得隨滅至得大菩提者若修行人但觀察人相唯得聲聞緣覺菩提若觀察一切法相卽得無上菩提如是隨其所縛而得解脫此名如實知解脫問此解脫由何所知由何所盡偈曰

若智緣真如 遠離彼二執 亦知熏聚因

依他性卽盡

釋曰若具知三性卽盡依他性若智緣真如者是知真實性遠離彼二執者是知分別性亦知熏聚因者是知依他性依他性卽盡者由知三性卽熏習聚盡熏習聚者謂阿梨耶識問此盡有何功德偈曰

緣彼真如智 觀察無異相 有非有現見

想作自在成

釋曰觀察無異相者別相及如無差別見故此說二乘與菩薩差別二乘相及無相差別而見如是見已悉捨於相於無相界起作意緣入無相三昧菩薩則不爾於真如外不見別有諸相於無相界亦見無相由菩薩智無種種相修故有非有現見者有名真如境界非有名相境界皆現見故想作自在成者謂欲作神通等事一切皆由憶想分別而成此是如實知利益問凡夫及菩薩二見云何顯示偈曰

覆實見不實 應知是凡夫 見實覆不實
如是名菩薩

釋曰凡夫無功用不見真如見不真實相菩薩無功用見真如不見不真實相問已知差別云何轉依及得解脫偈曰

不見見應知 無義有義境 轉依及解脫
以得自在故

釋曰無義境界謂諸相此卽不見有義境界謂真如此卽見如是說名轉依見所執境界無體及見真如有體如是說名解脫何以故以得自在故自在者謂

隨自意轉自然不行諸境界如經說若有相則被縛若被縛則無解脫不行一切境界卽是解脫問云何如實知淨土方便偈曰

衆生同一種 地境皆普見 此卽淨土障
應知亦應捨

釋曰衆生同一種地境皆普見者器世界是大境界一切衆生同見一種類皆言此是大地故此卽淨土障者由作此見卽與淨土方便而爲障礙應知亦應捨者菩薩知此想爲障礙已卽應勤捨此想是名對治已說菩薩四種如實知次說菩薩五種無量偈曰

應化及應淨 應得亦應成 應說此五事

菩薩五無量

釋曰五事無量者一應化事無量由攝一切眾生界故二應淨事無量由攝一切器世界故三應得事無量由攝一切法界故四應成事無量由攝一切可化眾生故五應說事無量由攝十二部經是化眾生方便故已說菩薩五種無量次說菩薩說法有八果偈曰

發心及得忍 淨眼與盡漏 法住學亦斷
受用為八果

釋曰菩薩若勤說法能得八果一諸聽法者或發菩提心二或得無生忍三或於諸法遠塵離垢得法眼淨此謂下乘所攝四或得諸漏盡五令正法久住由此正說得展轉受持故六未學義者令得學義七未斷疑者令得斷疑八已斷疑者令得受用正法無障大喜味已說菩薩說法有八果次說大乘七大義偈曰

緣行智勤巧 畏事皆具足 依此七大義
建立於大乘

釋曰若具足七種大義說為大乘一者緣大由無量

修多羅等廣大法爲緣故二者行大由自利利他行皆具足故三者智大由人法二無我一時通達故四者勤大由三大阿僧祇劫無間修故五者巧大由不捨生死而不染故六者畏大由至得力無所畏不共法故七者事大由數數示現大菩提大涅槃故已說大乘七大義次說八法攝大乘偈曰

性信心行入 成淨菩提勝 如是八種事

總攝諸大乘

釋曰此以八事總攝一切大乘八事者一種性如性品說二信法如信品說三發心如發心品說四行行

如度攝品說五入道如教授品說六成熟衆生謂初七地七淨佛國土謂第八不退地八菩提勝謂佛地菩提有三種謂聲聞菩提緣覺菩提佛菩提佛菩提大故爲勝於此佛地示現大菩提及大涅槃故已說八法攝大乘次說菩薩五人差別偈曰

信行及淨行 相行無相行 及以無作行

差別依諸地

釋曰菩薩有五人差別一信行人謂地前一阿僧祇劫二淨心行人謂入初地三相行人謂二地至六地四無相行人謂第七地五無作行人謂後三地已說

菩薩五人差別次說菩薩諸相差別偈曰

不著及清淨 降瞋與勤德 不動并見實

有欲名菩薩

釋曰此偈以自利門說菩薩相不著者是能行施不著諸欲故清淨者是能持戒降瞋者是能忍辱勤德者是能精進不動者是能習定見實者是能修智有欲者是能起願樂大菩提故行此七事說名菩薩相偈曰

隨攝及無惱 耐損并勇力 不放逸多聞

利彼名菩薩

釋曰此偈以利他門說菩薩相隨攝者是施恒以四攝攝衆生故無惱者是戒自性於他不起惱害見故耐損者是忍他來違逆不懷加報意故勇力者是進在苦度衆生無有退屈心故不放逸者是定不著禪味來就下處生故多聞者是智能斷一切衆生疑故如是勤行利他是菩薩相偈曰

厭財及捨欲 忘怨亦勤善 巧相無惡見

內住名菩薩

釋曰此偈以住功德門說菩薩相厭財者住施功德知慳財過墮於惡道來貧窮故捨欲者住戒功德若

著五欲不能出家受持戒故忘怨者住忍功德他來損已不懷不報故懷報者如似畫石不懷報者如似畫水一墮惡道一生善趣勤善者住進功德爲自他二利恒行六波羅蜜故巧相者住定功德善能分別止舉捨三相故無惡見者住智功德一切諸相不可得故內住者住願功德內謂大乘論住不動故偈曰
具悲亦起慙 耐苦及捨樂 持念并善定
不捨名菩薩

釋曰此偈以不退門說菩薩相具悲者是施不退愍他苦人能行施故起慙者是戒不退觀此世他世及法人不造諸非故耐苦者是忍不退風雨寒熱等及他違損事一切皆忍故捨樂者是進不退能行正勤人不著自樂故持念者是定不退能善攝心人由念力故善定者是慧不退無分別智具足故不捨者是願不退不捨大乘故偈曰

除苦不作苦 容苦不畏苦 脫苦不思苦
欲苦名菩薩

釋曰此偈以離苦門說菩薩相除苦者是施施他物時除他貧窮故不作苦者是戒戒自居時不作苦惱他故容苦者是忍自他利時諸苦能受故不畏苦者

是進行難行時恒得不退故脫苦者是定離欲欲界
時解脫苦苦故不思苦者是慧三輪清淨時不起分
別故欲苦者是願爲化衆生樂住生死故偈曰

樂法及性法 訶法亦勤法 自在法明法

向法名菩薩

釋曰此偈以攝法門說菩薩相樂法者是施愛施等
法故性法者是戒自性護持故訶法者是忍譏嫌瞋
法故勤法者是進勤行大乘法故自在法者是定諸
禪自在故明法者是慧無上般若具足故向法者是
願一向樂大菩提故問云何名法答由一切諸波羅

蜜法皆隨轉故偈曰

財制護善樂 法乘於此七 七種不放逸

是故名菩薩

釋曰此偈以不放逸門說菩薩相一財不放逸此由
布施不施不堅施則堅固故二制不放逸此由持戒
如佛說應作者作不應作者不作故三護不放逸此
由忍辱護自他心無兩害故四善不放逸此由精進
常起正勤行六度故五樂不放逸此由修定諸禪樂
受不味著故六法不放逸如實真法此能知故七乘
不放逸此由大願魔王來壞其菩提心亦不退故偈

曰

不遂及小罪 不忍退亦亂 小見及異乘

七羞名菩薩

釋曰此偈以有羞門說菩薩相一不遂羞羞慳貪故
二小罪羞羞微細罪見怖畏故三不忍羞羞不忍故
四退羞羞懈怠故五亂羞羞退定故六小見羞羞餘
小執通達法無我故七異乘羞羞起小乘心捨大菩
提故偈曰

今世後世捨 起勤亦得通 等說及大果

七攝名菩薩

釋曰此偈以攝生門說菩薩相一今世攝謂以布施
攝現在衆生二後世攝謂以持戒攝未來衆生得勝
生處方能攝故三捨攝謂以忍辱攝有惱亂衆生四
起勤攝謂以精進攝懈怠衆生五得通攝謂以禪定
攝他方衆生往彼化故六等說攝謂以智慧攝下中
上衆生等心爲說無增減故七大果攝謂以大願若
得佛果攝諸衆生無有餘故此諸偈義以異門說六
度及大願是菩薩相應知已說菩薩諸相差別次說
菩薩諸名差別偈曰

應知諸菩薩 亦名摩訶薩 亦名有慧者

亦名上成就 亦名降伏子 亦名降伏持

亦名能降伏 亦名降伏牙 亦名爲勇猛

亦名爲上聖 亦名爲導師 亦名大名稱

亦名爲有悲 亦名大福德 亦名自在行

亦名正說者

釋曰此十六名皆依義立一切菩薩總有此名若人聞有此名應知卽是菩薩已說菩薩諸名差別次說菩薩諸義差別偈曰

實覺大義覺 一切覺恒覺 及以方便覺

五覺名菩薩

釋曰由有五覺故名菩薩一者實義覺覺人法無我故二者大義覺覺自他義故三者一切覺覺一切種義故四者恒覺雖現涅槃覺無盡故五者方便覺覺隨物機而作方便故偈曰

隨我及小見 及以諸識身 亦於虛分別

四覺名菩薩

釋曰復由四覺名爲菩薩一隨我覺由覺心故心謂阿梨耶識二小見覺由覺意故意謂與我見等四惑相應緣阿梨耶識者三識身覺由覺識故識謂六識身四虛分別覺由覺不真分別故不真分別者卽前

心意識一切菩薩唯覺此是不真分別故偈曰

無境及真義 永無亦圓滿 亦得不可得

五覺名菩薩

釋曰復由五覺名爲菩薩一無境覺依他性故二真義覺覺真實性故三永無覺覺分別性故四圓滿覺覺一切境一切種故五不可得覺覺三輪清淨故三輪者一應覺謂菩薩境二依覺謂菩薩身三覺性謂菩薩智此三不可得故名不可得覺偈曰

成就及處所 胎藏隨次現 及以斷深疑

五覺名菩薩

釋曰復由五覺名爲菩薩一成就覺謂成佛果二處所覺謂住兜率天宮三胎藏覺謂入母胎四隨次現覺謂出胎受欲出家修行成道五斷深疑覺謂爲諸衆生轉大法輪偈曰

得不得及住 於自亦於他 有說與無說

有慢及慢斷 未熟亦已熟 如此十一種

一切皆能覺 是故名菩薩

釋曰復由十一種覺故名菩薩得不得及住者如其次第過去未來現在覺於自亦於他者謂內覺外覺有說與無說者謂麤覺細覺有慢及慢斷者謂劣覺

勝覺未熟亦已熟者謂遠覺近覺未熟者覺彼久遠
方覺已熟者覺彼於近卽覺功德品究竟

大乘莊嚴經論卷第十二 終

音釋

娉 疋正切 威夾切
娶問也 陋 威夾切 隘也

大乘莊嚴經論卷第十三

無 著 菩 薩 造

唐三藏波羅頗迦羅蜜多羅譯

行住品第二十三

釋曰已說菩薩功德次說菩薩五種相偈曰

內心有憐愍 愛語及勇健 開手并釋義
此五菩薩相

釋曰菩薩有五種相一憐愍二愛語三勇健四開手
五釋義憐愍者以菩提心攝利衆生故愛語者令於
佛法得正信故勇健者難行苦行不退屈故開手者

論
以財攝故釋義者以法攝故此五種相應知初一是
心後四是行已說菩薩五種相次說菩薩在家出家
分偈曰

菩薩一切時 恒居輪王位 利益衆生作
在家分如此

釋曰菩薩在家恒作輪王化行十善離於十惡此是
利益偈曰

受得及法得 及以示現成 三種出家分
在於一切地

釋曰菩薩出家有三分一受得分謂從他受護二法

得分謂得無流護三示現分謂變化作受得分謂信
行地法得分及示現分謂入大地偈曰

應知出家分 無量功德具 欲比在家分
最勝彼無等

釋曰二分校量出家分勝由無量功德具足故已說
菩薩在家出家分次說菩薩五種極大心偈曰

愛果及善根 涅槃欲令得 未淨淨極淨
謂在諸地中

釋曰五極大心者一樂極大心二利極大心三未淨
極大心四已淨極大心五極淨極大心愛果者謂樂

極大心令諸衆生得後世愛果故善根者謂利極大
 心令諸衆生現行諸善及得涅槃故未淨者謂未淨
 極大心卽信行地菩薩淨者謂已淨極大心卽初地
 至七地菩薩極淨者謂極淨極大心卽後三地菩薩
 已說菩薩五種極大心次說菩薩四種攝衆生偈曰
 欲樂及平等 增上與徒衆 四心於諸地
 攝受一切生

釋曰四種攝衆生者一欲樂心攝由以菩提心攝故
 二平等心攝由入初地得自他平等心攝故三增上
 心攝由居主位以自在力攝故四徒衆心攝由攝成

自弟子故已說菩薩四種攝衆生次說菩薩四種受
 生偈曰

業力及願力 定力亦通力 依此四種力
 菩薩而受生

釋曰四種受生者一業力生二願力生三定力生四
 通力生業力生者謂信行地菩薩業力自在隨所欲
 處而受生故願力生者謂入大地菩薩願力自在爲
 成熟他受畜生等生故定力生者謂得定菩薩定力
 自在捨於上界下受生故通力生者謂得神通菩薩
 通力自在能於兜率天等示現諸相而受生故已說

菩薩四種受生次說菩薩十一住相偈曰

證空證業果 住禪住覺分 觀諦觀緣起

無相無功用 化力淨二門 及以菩提淨

以此諸所說 立地相應知

釋曰十一住者卽十一地住者名地故證空者顯初住相多住人法二無我故證業果者顯第二住相證業及果不壞能護戒故住禪者顯第三住相能生欲界而不退禪故住覺分者顯第四住相能入生死而不捨覺分故觀諦者顯第五住相以明教化惱唯惱心以我無故觀緣起者顯第六住相能不起染心而

依緣起受生故無相者顯第七住相行雖功用而上叅一道多住無相故無功用者顯第八住相雖淨佛土而無起作多住無功用故化力者顯第九住相四辯自在能成熟一切衆生故淨二門者顯第十住相三昧門陀羅尼門極清淨故淨菩提者顯第十一住相一切智障斷究竟故已說菩薩十一住相次說菩薩依地立名偈曰

初三三行淨 次三三慢斷 後三覺捨化

第十有四名

釋曰於十地中建立十菩薩名初三三行淨者初地

名見淨菩薩得人法二見對治智故第二地名戒淨
菩薩微細犯垢永無體故第三地名定淨菩薩諸禪
三昧得不退故次三三慢斷者第四地名斷法門異
慢菩薩於諸經法破起差別慢故第五地名斷相續
異慢菩薩入十平等心於一切相續得平等故第六
地名斷染淨異慢菩薩如性本淨客塵故染能住緣
起法如不起黑白差別見故後三覺捨化者第七地
名得覺菩薩住無相力能念念中修三十七覺分故
第八地名行捨菩薩住無功用無相故亦名淨土菩
薩方便行與不退地菩薩合故第九地名化衆生菩

薩能成熟一切衆生故第十有四名者一名大神通
菩薩得大神通故二名滿法身菩薩具無量三昧門
陀羅尼門故三名能現身菩薩住兜率天等示相身
故四名受職菩薩於諸佛所得受職故已說菩薩依
地立名次說菩薩隨地修學及學果偈曰

隨次依前六 見性修三學 隨次依後四
得果有四種

釋曰隨次依前六見性修三學者菩薩於初地通達
真如第二地學增上戒第三地學增上心第四第五
第六地學增上慧慧有二境一法實謂苦等四諦二

緣起謂逆順觀十二因緣此二境亦在第二第三地中是故彼地亦增上慧建立然第四地中菩提分慧增上第五地中諦觀慧增上第六地中緣起觀慧增上故此三地建立增上慧學隨次依後四得果有四種者依第七地得無相有用住爲第一果依第八地得無相無功用住爲第二果依第九地得成熟衆生爲第三果依第十地得二門成熟爲第四果已說隨地修學及學果次說菩薩隨地修習無流五陰偈曰

見性淨三身 亦在前六地 餘地淨餘二

遠離五障故

釋曰初地見性如前解第二地中戒身清淨第三地中定身清淨第四第五第六地中慧身清淨後四地及佛地解脫身解脫知見身清淨由離五障故五障者第七地中以執相無知爲障第八地中以功用無知爲障第九地中以不能化生無知爲障第十地中以未淨二門無知爲障佛地中以礙障無知爲障謂此無知能礙聲聞緣覺境界智謂佛知一切境無礙由解脫此障故已說菩薩隨地修無流五陰次說菩薩隨地成就未成就偈曰

未成就成就 成復未成成 如地建立知
分別無分別

釋曰未成就成就者彼信行地是未成就自餘諸地是名成就成復未成者於前成就地中復有未成就成就七地已還名未成就有功用故八地已上是名成就無功用故問前說歡喜地亦是成就此義云何答如地建立知分別無分別此由於地建立中知唯分別於此分別亦無分別所執能執俱無體故約此義故說名成就偈曰

應知諸地中 修習及成就 此二不思議

諸佛境界故

釋曰菩薩於諸地中各有修習及成就應知地地皆不可思議由諸菩薩內自證覺是諸佛所知非餘人境界故已說菩薩隨地成就未成就次說菩薩入地十種相偈曰

明信及無劣 無怯亦無待 通達及平等

離偏亦離著 及以知方便 亦在聖衆生

如此十種相 地地皆圓滿

釋曰入地菩薩地地皆有十相何者爲十一明信二無劣三無怯四無待五通達六平等七離偏八離著

九知方便十聖衆生明信者於自地得明於諸法中除無知故於他地得信於後諸地生願樂故無劣者聞深妙法不驚怖故無法者行難行行極勇猛故無待者起自地行不待教故通達者他地方便能起故平等者普於衆生同自心故離偏者耳聞毀譽無高下故離著者得輪王等位無愛染故知方便者知諸法不可得爲佛方便故聖衆生者諸佛徒衆恒在生故此等十相地地皆具應知已說菩薩入地十種相次說菩薩地中十度相偈曰

有欲無六障 其次無亂慧 不漂亦不迴

事友及供養 迴向將生勝 修善與戲通

功德藏如是 佛子十六相

釋曰諸菩薩於諸地中得十度有十六相何者十六一有欲樂行諸度故二無慳離施障故三無違離戒障故四無恚離忍障故五無懈離進障故六慈悲離定障故慈悲能與樂拔苦是瞋惱對治由定得故七無惡慧離慧障故惡慧有三謂自性分別隨憶分別顯示分別此能斷故八無亂慧離異乘心故九不漂不爲人天勝樂醉其心故十不迴不爲不成就苦及難行苦退其心故十一事友依佛所示善知識聞大

乘故十二供養三寶故十三迴向善巧方便故十四
 生勝此顯願波羅蜜相離八難處不離諸佛菩薩故
 十五修善此顯力波羅蜜相無間修諸善根故十六
 戲通此顯智波羅蜜相遊戲諸大神通功德故菩薩
 若得此相則爲一切衆中上首是名佛子十六相已
 說菩薩地中十度相次說菩薩度度五功德偈曰

地地昇進時 度度有五德 二及二及一

應知止觀俱

釋曰地地昇進時度度有五德者菩薩於一一地修
 一一度於一一度皆具五種功德何者爲五一滅習

二得猗三圓明四相起五廣因滅習者一一剎那滅
 除依中習氣聚故得猗者離種種相得法樂故圓明
 者遍知一切種不作分段故相起者由入大地無分
 別相生故廣因者爲滿爲淨一切種法身福聚智聚
 攝令增長故二及二及一應知止觀俱者此中應知
 初二功德是奢摩他分次二功德是毗鉢舍那分第
 五功德是俱分已說菩薩度度五功德次釋菩薩十
 地名偈曰

見真見利物 此處得歡喜 出犯出異心

是名離垢地 求法持法力 作明故名明

惑障智障薪 能燒是焰慧 難退有二種

能退故難勝 不住二法觀 恒現名現前

離道隣一道 遠去名遠行 相想無相想

動無不動地 四辯智力巧 說善稱善慧

二門如雲遍 雨法名法雲

釋曰見真見利物此處得歡喜者菩薩於初地中一見真如謂見自利昔曾未見今時始見去菩提近故二見利物謂見利他一刹那能成熟百衆生故由此二見起勝歡喜故名歡喜地出犯出異心是名離垢地者菩薩於二地中出二種垢一出犯戒垢二出

起異乘心垢由出二垢故名離垢地如十地經說我等應得應淨一切種智故勤精進求法持法力作明故名明者菩薩於三地中得三昧自在力於無量佛法能求能持得大光明爲他作明由能以法自明明他故名明地惑障智障薪能燒是焰慧者菩薩於四地中以菩提分慧爲焰自性以惑智二障爲薪自性此地菩薩能起慧焰燒二障薪故名焰慧地難退有二種能退故難勝者菩薩於五地中有二種難一勤化衆生心無惱難二衆生不從化心無惱難此地菩薩能退二難於難得勝故名難勝地不住二法觀恒

現名現前者菩薩於六地中依般若力能不住生死
涅槃二法如此觀慧恒現在前故名現前地離道隣
一道遠去名遠行者菩薩於七地中近一乘道故名
爲遠去問誰是遠去答功用方便究竟此遠能去由
此遠去故名遠行地相想無相想動無不動地者菩
薩於八地中有相想及無相有功用想二想俱不能
動由無此動故故名不動地四辯智力巧說善稱善
慧者菩薩於九地中四無礙慧最爲殊勝於一剎那
頃三千世界所有人天異類異音異義異問此地菩
薩能以一音普答衆問遍斷衆疑由此說善故名善

慧地二門如雲遍雨法名法雲者菩薩於十地中由
三昧門及陀羅尼門攝一切聞熏習因遍滿阿梨耶
識中譬如浮雲遍滿虛空能以此聞熏習雲於一一
剎那於一一相於一一好於一一毛孔雨無量無邊
法雨充足一切可化衆生由能如雲雨法故名法雲
地問釋別名已云何名住云何名地偈曰

爲集諸善根 樂住故說住 數數數無畏

復以地爲名

釋曰爲集諸善根樂住故名住者謂菩薩爲成就種
種善根於一切時樂住一切地是故諸地說名爲住

論
大正新編大藏經卷第十三
二
非
數數數無畏復以地爲名者步彌耶名爲地步者數
數義彌者實數義耶者無畏義諸菩薩欲進上地於
一一地中數數斷障礙數數得功德是名數數義地
以十數爲量諸菩薩於一一地中知斷爾所障礙知
得爾所功德知此不虛是名實數義上地是無畏處
諸菩薩畏於自地中退失自他利功德進求上地是
名無畏義由此三義故名爲地已說菩薩十地名次
說菩薩四種得地差別偈曰

由信及由行 由達亦由成 應知諸菩薩
得地有四種

釋曰四種得地者一由信得二由行得三由通達得
四由成就得由信者以信得諸地故如信地中說由
行者以正行得諸地故諸菩薩於大乘法有十種正
行一書寫二供養三流傳四聽受五轉讀六教他七
習誦八解說九思擇十修習此十正行能生無量功
德聚此行得地故名行得通達者通達第一義諦乃
至七地名通達得成就者八地至佛地名成就得已
說菩薩四種得地差別次說菩薩四種修行差別偈
曰

諸度諸覺分 諸通及諸攝 爲大亦爲小

俱入亦俱成

釋曰總說一切菩薩行不過四種一波羅蜜行二菩提分行三神通行四攝生行說波羅蜜行爲求大乘衆生說菩提分行爲求小乘衆生說神通行爲令二種衆生得入佛法說攝生行爲令二種衆生成熟佛法行住品究竟

敬佛品第二十四

釋曰已說菩薩行住次說禮佛功德偈曰

合心及離心 不離利益心 憐愍諸衆生
救世我頂禮

釋曰此偈禮如來無量勝功德合心者是慈心由與樂故離心者是悲心由拔苦故不離心者是喜心由恒悅故利益心者是捨心由無染故偈曰

一切障解脫 一切世間勝 一切處遍滿
心脫我頂禮

釋曰此偈禮如來三處勝功德一切障解脫者顯解脫勝由一切惑障一切智障得解脫故一切世間勝者顯制入勝由心自在隨其所緣隨意轉故一切處遍滿者顯遍入勝由一切境中智遍滿故由此三義心於三處而得解脫故說心解脫偈曰

能遮彼惑起 亦能害彼惑 染汗諸衆生

悲者我頂禮

釋曰此偈禮如來無諍勝功德能遮彼惑起者一切衆生應起煩惱如來凡所作業能令不起亦能害彼惑者彼惑若已起如來亦能令起對治方便若餘人無諍但能令他緣自不起煩惱而不能令他起對治如來無諍則不爾非但令彼不起亦能令彼起對治是故爲勝染汗諸衆生悲者我頂禮者如來無諍三昧於一切染汗衆生徧起憐愍是故於彼名爲悲者偈曰

無功用無著 無礙恒寂靜 能釋一切疑

勝智我頂禮

釋曰此偈禮如來願智勝功德如來願智由五事勝一於起無功用二於境不著三於中無礙四恒時寂靜五能釋衆疑由此五義是故爲勝餘人願智一非無功用作意起故二非無著假定力故三非無礙少分知故四非恒靜非常定故五不釋疑有無知故偈曰

所依及能依 於言及於智 說者無礙慧

善說我頂禮

論 大乘生要至命卷第十三 七

釋曰此偈禮如來無礙勝功德所說有二種一所依謂法二能依謂義說具有二種一方言二巧智如來於此所說及說具慧常無礙是故爲勝說者卽顯無礙業開示有方故名善說偈曰

能去及能聞 知行知來去 令彼得出離

教授我頂禮

釋曰此偈禮如來神通勝功德能去者是如意通能往彼彼所故能聞者是天耳通能聞彼彼音故知行者是他心通能知彼人心行差別故知來者是宿住通能知彼人前世從此因來故知去者是生死通能

知彼人今世從此因去故令彼得出離者是漏盡通能如實爲彼說法故偈曰

衆生若有見 知定是丈夫 深起淨信心

方便我頂禮

釋曰此偈禮如來相好勝功德一切衆生若有見者卽知如來是大丈夫及於如來起淨信業由以相好爲方便故偈曰

取捨住變化 定智得自在 知此四清淨

世尊我頂禮

釋曰此偈禮如來清淨勝功德清淨四種一身清淨

二緣清淨三心清淨四智清淨取捨住者顯身清淨
能於自身壽中若取若捨若住得自在故變化者顯
緣清淨能於諸境轉變起化得自在故定者顯心清
淨能於諸定出入得自在故智者顯智清淨能知諸
境無礙得自在故偈曰

方便及歸依 清淨與出離 於此破四誑
降魔我頂禮

釋曰此偈禮如來力勝功德魔依四事破壞衆生何
者四事一依方便誑惑衆生言受用五塵得生善道
不墮惡道二依歸依誑惑衆生言自在天等是歸依

處餘處則非三依清淨誑惑衆生言世間諸定唯此
清淨餘非清淨四依出離誑惑衆生言小乘道果唯
此出離非有大乘佛爲破魔四事顯已十力一以是
非智力破魔第一事由善方便可得生天非惡方便
故二以自業智力破魔第二事由自業生天非依自
在天等力故三以禪定智力破魔第三事由具知禪
定解脫三昧三摩跋提故四以後七智力破魔第四
事由下根等令離上根等安置故偈曰

於智亦於斷 於離亦於障 能說自他利
摧邪我頂禮

釋曰此偈禮如來無畏勝功德於智者是說一切智無畏於斷者是說漏盡無畏於離者是說盡苦道無畏於障者是說障道無畏此中智及斷是說自利功德離及障是說利他功德若諸外道難言瞿曇非具一切智非盡一切漏說道不能盡苦說障不能妨道如來於此四難而能摧伏故名無畏偈曰

在衆極治罰 自無所護故 離二染正住
攝衆我頂禮

釋曰在衆極治罰自無所護故者此禮如來不護勝功德若自有所護在衆不能說極治罰故離二染正住者此禮如來念處勝功德離二染者無喜愛故正住者不思念故由此二種功德勝故能攝於一切徒衆此卽是業偈曰

行住一切處 無非一切智 由斷一切習
實義我頂禮

釋曰此偈禮如來斷習勝功德如來於一切處一切時行住等事無非一切智威儀由具斷一切煩惱習故若無一切智者煩惱雖盡而習不盡於行住時或逢奔車逸馬卽被損害由非一切智威儀故如來無此事由實有一切智故偈曰

論 一
大乘菩薩經論卷第十三
七
三

利益衆生事 隨時不過時 所作恒無謬
不忘我頂禮

釋曰此偈禮如來不忘勝功德如來作利益衆生事
恒得其時不過其時此是不忘法業如來所作一切
時皆實不虛此是不忘法自性偈曰

晝夜六時觀 一切衆生界 大悲具足故
利益我頂禮

釋曰此偈禮如來大悲勝功德如來以大悲故晝夜
六時觀察衆生誰退誰進未起善根者令其得起已
起善根者令其增進雖日六時而實一切時恒轉法

輪由大悲具足故此卽大悲業於一切衆生常起利
益意此是大悲自性偈曰

由行及由得 由智及由業 於一切二乘
最上我頂禮

釋曰此偈禮如來不共勝功德如來有十八不共法
一身無失二口無失三念無失四無異想五無不定
心六無不知已捨七欲無減八精進無減九念無減
十慧無減十一解脫無減十二解脫知見無減十三
智知過去無著無礙十四智知未來無著無礙十五
智知現在無著無礙十六身業隨智慧行十七口業

隨智慧行十八意業隨智慧行此中由行者攝初節六不共由得者攝第二節六不共由智者攝第三節三不共由業者攝第四節三不共一切聲聞緣覺於餘一切衆生爲上如來由此四事不共故於彼上得上故名最上偈曰

三身大菩提

一切種得故

衆生諸處疑

能除我頂禮

釋曰此偈禮如來種智勝功德三身者一自性身二受用身三化身此說種智自性問此智於一切境知一切種復云何答一切衆生於一切處生疑此智能

斷此說種種智業偈曰

無著及無過

無穢亦無息

無動無戲論

清淨我頂禮

釋曰此偈禮如來度滿勝功德無著者於諸資財無所染故無過者於身等業永無垢故無穢者世法諸苦不濁心故無息者少有所得不卽住故無動者心恒寂靜不散亂故無戲論者一切法中所有分別皆不行故如來此六圓滿具離六障故名清淨偈曰

成就第一義

出離一切地

於他得尊極

解脫諸衆生

無盡等功德

現出皆具足

世見衆亦見 不見人天等

釋曰此二偈禮如來佛相勝功德此中略說佛相有六種一體二因三果四業五相應六差別由此六種表知是佛故說佛相成就第一義者此是體相由真如最清淨第一義成就故出離一切地者此是因相由出離一切菩薩地故於他得尊極者此是果相由於一切衆生中得第一故解脫諸衆生者此是業相由能令一切衆生得解脫故無盡等功德現世皆具足者此是相應相世見衆亦見不見人天等者此是差別相世見者謂種種世界皆見此是化身衆亦見

者謂佛大弟子衆亦見此是受用身不見者謂人天等一切時不見此是自性身此卽三身差別敬佛品究竟

大乘修多羅莊嚴論極清淨時說已究竟

大乘莊嚴經論卷第十三

終

如是我聞一時婆伽婆在伽耶城伽耶山頂塔初得
菩提與大比丘衆滿足千人俱其先悉是編髮梵志
應作已作所作已辦棄捨重擔逮得已利盡諸有結
正智心得解脫一切心得自在已到彼岸皆是阿羅
漢諸菩薩摩訶薩無量無邊皆從十方世界來集有
大威德皆得諸忍諸陀羅尼諸深三昧具諸神通其
名曰文殊師利菩薩觀世音菩薩得大勢菩薩香象
菩薩勇施菩薩勇修行智菩薩等而爲上首如是諸
菩薩摩訶薩其數無量并諸天龍夜叉乾闥婆阿脩
羅迦樓羅緊那羅摩睺羅伽人非人等大衆圍繞

論曰如是我聞一時等集法者語在伽耶城者示現
所住處成就故伽耶山頂者示現彼形相大衆行在
處故塔者示現爲彼能供養者與供養故初得菩提
者卽彼成佛時故與大比丘衆者以其大故以不增
不損故滿足千比丘編髮梵志者此明學無學比丘
是名聽者成就餘者次說諸菩薩行差別彼菩薩行
有二種攝法所攝何等爲二一者因攝二者果攝又
伽耶山頂塔者根本序分以無量諸佛所住處故示
現彼處諸佛如來集故此法門者諸佛如來所攝護
故應聞此修多羅者攝取成就學無學其先悉是編

髮梵志又無學者有八種德何等爲八一者所作畢竟如經應作已作故二者畢竟過於應作已作如經所作已辦故三者遠離三昧障如經棄捨重擔故四者捨離所受重擔如經逮得已利故彼重擔者所謂五陰五者證涅槃如經盡諸有結故六者過三界如經正智心得解脫故七者依不顛倒受教修行如經一切心得自在已到彼岸故以善遠離諸煩惱故八者如實修行四如意足如經皆是阿羅漢故又阿羅漢者能受信者所施物故故名應供又學有二種何等爲二一者善畢竟持戒學道故二者如心所求畢

竟滿足故

次說三昧分

經曰爾時世尊獨靜無人入於諸佛甚深三昧觀察法界

論曰入三昧觀察者示現非是思量境界故又入三昧者示現不同聲聞辟支佛故此明非聲聞辟支佛境界故

已說三昧分次說能觀清淨分

經曰而作是念我得阿耨多羅三藐三菩提得一切智慧所作已辦除諸重擔度諸有險道滅無明得真

明拔諸箭斷渴愛成法船擊法鼓吹法螺建法幢轉
生死種示涅槃性閉塞邪道開於正路離諸罪田示
于福田

論曰能觀清淨者示現已得菩提故如經而作是念
我得阿耨多羅三藐三菩提故得菩提者示現勝彼
聲聞辟支佛證智故如經得一切智慧故彼得一切
智慧者有十七種何等十七一者本願滿足如經所
作已辦故二者捨離所取重擔如經除諸重擔故又
重擔者所謂五陰三者善斷一切諸煩惱障如經度
諸有險道故四者善斷一切智障如經滅無明故五

者證如實妙法如經得真明故六者離一切邪箭如
經拔諸箭故七者離諸願如經斷渴愛故八者成就
出世間慧如經成法船故九者轉妙法輪如經擊法
鼓故十者出無我妙聲善能降伏一切諸魔如經吹
法螺故十一者善能降伏一切外道如經建法幢故
十二者善斷一切諸結因緣如經轉生死種故十三
者說世間出世間妙法如經示現涅槃性故十四者
善能遠離顛倒取相如經閉塞邪道故十五者轉八
聖道如經開於正路故十六者善能遠離外道福田
如經離諸罪田故十七者示現三寶福田如經示于

福田故

已說能觀清淨分次說所觀法分

經曰我今當觀彼法誰得阿耨多羅三藐三菩提以何等智得阿耨多羅三藐三菩提何者是所證阿耨多羅三藐三菩提

論曰以何等人能證菩提以何等智能證菩提何者是所證菩提觀彼三法於三世中虛妄分別無有實體

經曰為以身得為以心得若以身得身則無知無覺如草如木如塊如影無所識知四大所造從父母生

其性無常假以衣服飲食臥具澡浴而得存立此法必歸敗壞磨滅

論曰經言為以身得為以心得者示現身心不證菩提故此明何義以離身心更無實者如愚癡人虛妄分別無有如是證菩提者故以何等人能證菩提彼法於三世中虛妄分別無實體者以非身得菩提示現有八種法示現彼身不證菩提何等為八一者無作者如經若以身得身則無知無覺故二者虛妄取相成就如經如草如木如塊如影故三者遠離諸想如經無所識知故四者以諸因緣和合故生如經四

大所造故五者體本不淨如經從父母生故六者念
不住如經其性無常故七者如危朽物不可常保如
經假以衣服飲食臥具澡浴而得存立故八者體是
不實如經此法必歸敗壞磨滅故

已說非身得菩提示現以何等入得菩提者彼法於
三世中虛妄分別無有實體次說以何等智能證菩
提彼法於三世中虛妄分別無實體者以非心得菩
提示現

經曰若以心得心則如幻從衆緣生無處無相無物
無所有

論曰有六種法示現彼心不得菩提何等爲六一者
見顛倒法虛妄誑惑愚癡凡夫如經心如幻故二者
依善不善諸因緣生如經從衆緣生故三者無定住
處如經無處故四者虛妄分別取相實不可得如經
無相故五者自性空如經無物故六者遠行如經無
所有故已說非心得菩提示現以何等智得菩提者
彼法於三世中虛妄分別無有實體次說何者是所
證菩提彼法於三世中虛妄分別無有實體

經曰菩提者但有名字世俗故說無聲無色無成無
行無入不可見不可依去來道斷過諸言說出於三

論
界無見無聞無覺無著無觀離戲論無諍無示不可
觀不可見無響無字離言語道

論曰經言菩提者但有名字世俗故說者示現可證
法但有名用虛妄分別其體無實故彼但有名字世
俗故說有二十三種何等二十三一者無事如經無
聲故二者過覺境界如經無色故三者諸法體空如
經無成故四者離諸相如經無行故五者過一切世
間凡夫境界如經無入故六者過識境界如經不可
見故七者無可依處如經不可依故八者不生滅如
經去來道斷故九者過一切世間名字如經過諸言

說故十者善不善行諸法不可得如經出於三界故
十一者離見者如經無見故十二者過耳識境界如
經無聞故十三者過意識境界如經無覺故十四者
不住如經無著故十五者如虛空如經無觀故十六
者無爲如經離戲論故十七者無諸患離諸漏如經
無諍故十八者過小智境界如經無示故十九者無
量如經不可觀故二十者他不能見如經不可見故
二十一者內心無知如經無響故二十二者無物可
見如經無字故二十三不可說如經離言語故
經曰如是能證菩提者以何等智證菩提者所證菩

提法者如是諸法但有名字但假名說但和合名說
依世俗名說無分別分別說假成無成無物離物無
取不可說無著彼處無人證無所用證亦無法可證
如是通達是則名爲得阿耨多羅三藐三菩提無異
離異無菩提相

論曰次說云何證菩提者彼亦但有假名名字依世
俗說虛妄分別無實體故彼依世俗名說有六種何
等爲六一者不實分別如經無分別分別說故二者
體空如經假成無成故三者我不可得如經無物離
物故四者過世間慧如經無取故五者過言語道如

經不可說故六者遠離我所如經無著故又經言
彼處無人證無所用證亦無法可證如是通達是則
名爲得阿耨多羅三藐三菩提者此明何義明能證
人明所用證智明所證境界彼如是法以何等法用
妙正智慧如實知所見所知所證是名得阿耨多羅
三藐三菩提故又經言無異離異無菩提相者此明
何義無異離異二句明彼證法清淨寂靜故無菩提
相義如向所說已說所觀事分起分者此中復有何
義以三昧事說故以說時至故是故應起又於此中
有二種義一者以三昧中所觀察義欲爲文殊師利

說故二者文殊師利問如來答故何故如來唯告文殊師利而不告餘者以依對文殊師利說此法故又復何故唯對文殊師利說此法門以此所說法門深故是故告彼深智慧菩薩又何以故唯文殊師利問以如來但告文殊師利故是故文殊師利問隨順義故彼所發問以心清淨問答清淨故

次顯說分

經曰爾時文殊師利法王子在大會中立佛右面執大寶蓋以覆佛上時文殊師利默知世尊所念如是卽白佛言世尊若菩提如是相者善男子善女人云

何於菩提發心住佛告文殊師利善男子善女人應如是知彼菩提相而發心住文殊師利言世尊菩提相者當云何知佛告文殊師利菩提相者出於三界過一切世俗名字語言過一切響無發心發滅諸發是發菩提心住是故文殊師利諸菩薩摩訶薩過一切發是發心住文殊師利無發是發菩提心住文殊師利發菩提心者無物發住是發菩提心住文殊師利發菩提心者無障礙住是發菩提心住文殊師利發菩提心者如法性住是發菩提心住文殊師利發菩提心者不執著一切法是發菩提心住文殊師利

發菩提心者不破壞如實際是發菩提心住文殊師
利發菩提心者不移不益不異不一是發菩提心住
文殊師利發菩提心者如鏡中像如熱時燄如影如
響如虛空如水中月應當如是發菩提心住
論曰彼發清淨有九種何等爲九一者捨一切戲論
如經文殊師利無發是發菩提心住故二者捨取諸
法如經文殊師利發菩提心者無物發住是發菩提
心住故三者如虛空如經文殊師利發菩提心者無
障礙住是發菩提心住故四者寂靜如經文殊師利
發菩提心者如法性住是發菩提心住故五者捨取

常無常相如經文殊師利發菩提心者不執著一切
法是發菩提心住故六者不毀道不捨道如經文殊
師利發菩提心者不破壞如實際是發菩提心住故
七者離謗離著如經文殊師利發菩提心者不移不
益不異不一是發菩提心住故八者入一切法一相
如經文殊師利發菩提心者如鏡中像如熱時燄如
影如響如虛空如水中月應當如是發菩提心住故
又如實修行般若波羅蜜餘四句過三界等者如前
所說應知已顯說分

次說菩薩功德勢力分

經曰爾時會中有天子名月淨光德得不退阿耨多
羅三藐三菩提心問文殊師利言諸菩薩摩訶薩初
觀何法故行菩薩行依何法故行菩薩行文殊師利
答言天子諸菩薩摩訶薩行以大悲爲本爲諸衆生
天子又問文殊師利諸菩薩摩訶薩大悲以何爲本
文殊師利答曰天子諸菩薩摩訶薩大悲以直心爲
本天子又問文殊師利諸菩薩摩訶薩直心以何爲
本文殊師利答言天子諸菩薩摩訶薩直心以於一
切衆生平等心爲本天子又問文殊師利諸菩薩摩
訶薩於一切衆生平等心以何爲本文殊師利答言

天子諸菩薩摩訶薩於一切衆生平等心以無異離
異行爲本天子又問文殊師利諸菩薩摩訶薩無異
離異行以何爲本文殊師利答言天子諸菩薩摩訶
薩無異離異行以深淨心爲本天子又問文殊師利
諸菩薩摩訶薩深淨心以何爲本文殊師利答言天
子諸菩薩摩訶薩深淨心以阿耨多羅三藐三菩提
心爲本天子又問文殊師利諸菩薩摩訶薩阿耨多
羅三藐三菩提心以何爲本文殊師利答言天子諸
菩薩摩訶薩阿耨多羅三藐三菩提心以六波羅蜜
爲本天子又問文殊師利諸菩薩摩訶薩六波羅蜜

以何爲本文殊師利答言天子諸菩薩摩訶薩六波羅蜜以方便慧爲本天子又問文殊師利諸菩薩摩訶薩方便慧以何爲本文殊師利答言天子諸菩薩摩訶薩方便慧以不放逸爲本天子又問文殊師利諸菩薩摩訶薩不放逸以何爲本文殊師利答言天子諸菩薩摩訶薩不放逸以三善行爲本天子又問文殊師利諸菩薩摩訶薩三善行以何爲本文殊師利答言天子諸菩薩摩訶薩三善行以十善業道爲本天子又問文殊師利諸菩薩摩訶薩十善業道以何爲本文殊師利答言天子諸菩薩摩訶薩十善業

道以持戒爲本天子又問文殊師利諸菩薩摩訶薩持戒以何爲本文殊師利答言天子諸菩薩摩訶薩持戒以正憶念爲本天子又問文殊師利諸菩薩摩訶薩正憶念以何爲本文殊師利答言天子諸菩薩摩訶薩正憶念以正觀爲本天子又問文殊師利諸菩薩摩訶薩正觀以何爲本文殊師利答言天子諸菩薩摩訶薩正觀以堅念不忘爲本論曰諸菩薩摩訶薩功德勢力有二種何等爲二者如心所求一切滿足二者無障礙樂說辯才說法如心所求一切滿足者以起上上勝勝法故彼起上

論
上勝勝法者有十四種何等十四一者受教不忘如
經天子又問文殊師利諸菩薩摩訶薩正觀以何爲
本文殊師利答言天子諸菩薩摩訶薩正觀以堅念
不忘爲本故二者善取正教觀有爲法如經天子又
問文殊師利諸菩薩摩訶薩正憶念以何爲本文殊
師利答言天子諸菩薩摩訶薩正憶念以正觀爲本
故三者無彼處過如經天子又問文殊師利諸菩薩
摩訶薩持戒以何爲本文殊師利答言天子諸菩薩
摩訶薩持戒以正憶念爲本故四者不隨順諸過如
經天子又問文殊師利諸菩薩摩訶薩十善業道以

何爲本文殊師利答言天子諸菩薩摩訶薩十善業
道以持戒爲本故五者善修十善業道如經天子又
問文殊師利諸菩薩摩訶薩三善行以何爲本文殊
師利答言天子諸菩薩摩訶薩三善行以十善業道
爲本故六者身口意業三法清淨如經天子又問文
殊師利諸菩薩摩訶薩不放逸以何爲本文殊師利
答言天子諸菩薩摩訶薩不放逸以三善行爲本故
七者戒清淨如經天子又問文殊師利諸菩薩摩訶
薩方便慧以何爲本文殊師利答言天子諸菩薩摩
訶薩方便慧以不放逸爲本故八者隨順利益一切

論
衆生如經天子又問文殊師利諸菩薩摩訶薩六波羅蜜以何爲本文殊師利答言天子諸菩薩摩訶薩六波羅蜜以方便慧爲本故九者滿足一切助菩提法如經天子又問文殊師利諸菩薩摩訶薩阿耨多羅三藐三菩提心以何爲本文殊師利答言天子諸菩薩摩訶薩阿耨多羅三藐三菩提心以六波羅蜜爲本故十者不疲倦如經天子又問文殊師利諸菩薩摩訶薩深淨心以何爲本文殊師利答言天子諸菩薩摩訶薩深淨心以阿耨多羅三藐三菩提心爲本故十一者業果清淨如經天子又問文殊師利諸

菩薩摩訶薩無異離異行以何爲本文殊師利答言天子諸菩薩摩訶薩無異離異行以深淨心爲本故十二者修行清淨如經天子又問文殊師利諸菩薩摩訶薩於諸衆生平等心以何爲本文殊師利答言天子諸菩薩摩訶薩於諸衆生平等心以無異離異行爲本故十三者作利益一切衆生清淨如經天子又問文殊師利諸菩薩摩訶薩直心以何爲本文殊師利答言天子諸菩薩摩訶薩直心以於一切衆生平等心爲本故十四者心清淨如經天子又問文殊師利諸菩薩摩訶薩大悲以何爲本文殊師利答言

論
天子諸菩薩摩訶薩大悲以直心爲本故又經言爾時會中有天子名月淨光德得不退阿耨多羅三藐三菩提心問文殊師利言諸菩薩摩訶薩初緣何法故行菩薩行依何法故行菩薩行文殊師利答言諸菩薩摩訶薩行大悲爲本爲諸衆生如是等修多羅從後向前解釋應知

已說如心所求一切滿足次說無障礙樂說辯才說法

經曰天子又問文殊師利諸菩薩摩訶薩有幾種心能成就因能成就果文殊師利答言天子諸菩薩摩

訶薩有四種心能成就因能成就果何等爲四一者初發心二者行發心三者不退發心四者不生補處發心復次天子初發心如種種子第二行發心如芽生增長第三不退發心如莖葉華果初始成就第四一生補處發心如果等有用復次天子初發心如車匠集材智第二行發心如斫治材木淨智第三不退發心如安施材木智第四一生補處發心如車成運載智復次天子初發心如月始生第二行發心如月五日第三不退發心如月十日第四一生補處發心如月十四日如來智慧如月十五日復次天子初發

心能過聲聞地第二行發心能過辟支佛地第三不退發心能過不定地第四一生補處發心安住定地復次天子初發心如學初章智第二行發心如差別諸章智第三不退發心如筭數智第四一生補處發心如通達諸論智復次天子初發心從因生第二行發心從智生第三不退發心從斷生第四一生補處發心從果生復次天子初發心因攝第二行發心智攝第三不退發心斷攝第四一生補處發心果攝復次天子初發心因生第二行發心智生第三不退發心斷生第四一生補處發心果生復次天子初發心

因差別分第二行發心智差別第三不退發心斷差別分第四一生補處發心果差別分復次天子初發心如取藥草方便第二行發心如分別藥草方便第三不退發心如病服藥方便第四一生補處發心如病得差方便復次天子初發心學法王家生第二行發心學法王法第三不退發心能具足學法王法第四一生補處發心學法王法能得自在論曰無礙樂說辯才說法有四種發菩提心攝取十地以種種差別說故彼種種差別有十二句經言天子又問文殊師利諸菩薩摩訶薩有幾種心能成就

因能成就果文殊師利答言天子諸菩薩摩訶薩有四種心能成就因能成就果何等爲四一者初發心二者行發心三者不退發心四者一生補處發心者初發心能與第二行發心作因第二行發心能與第三不退發心作因第三不退發心能與第四一生補處發心作因此句明上上因勝不失故又經言復次天子初發心如種種子第二行發心如芽增長第三不退發心如莖葉華果初始成就第四一生補處發心如果等有用等者示現從清淨因成就清淨果故又經言復次天子初發心如車匠集材智者以依諸

願則能攝取一切佛法故第二行發心如斫治材木淨智者以成就清淨戒故第三不退發心如安施材木智者以依慧方便修一切行皆相應故第四一生補處發心如車成運載智等者以不捨先許重擔又經言復次天子初發心如月始生第二行發心如月五日第三不退發心如月十日第四一生補處發心如月十四日如來智慧如月十五日等者以示現上上大力精進故又經言復次天子初發心能過聲聞地者以初地前菩薩利根觀察一切菩提分法故第二行發心能過辟支佛地者以初地前菩薩依般若

勝智能集諸菩薩無量行故第三不退發心能過不定地者此已入初地得證智故又過聲聞辟支佛地者以過一切用功行故第四一生補處發心安住定地者以善任王子地故又經言復次天子初發心如學初禪智者以觀下地法故第二行發心如差別諸章智者以智慧增長差別故第三不退發心如筭數智者以方便智能數一切法故第四一生補處發心如通達諸論智者以得證智故又經言復次天子初發心從因生者以自性清淨本來成就故第二行發心從智生者以攝取世間出世間聞慧方便故第三

不退發心從斷生者以過一切世間戲論故第四一生補處發心從果生者以自然成就一切行故又經言復次天子初發心因攝者以信行助道淳熟故又以觀初地境界故第二行發心智攝者以依境界淳熟觀功用行故第三不退發心斷攝者以依修行境界未得佛法觀故第四一生補處發心果攝者以依果淳熟隨所有佛國土應成佛處即成佛又經言復次天子初發心因生者以不顛倒修行善根性故第二行發心智生者以不顛倒法究竟性故第三不退發心斷生者以不顛倒修行性故第四一生補處發

心果生者以得心自在故又經言復次天子初發心因差別分者以攝取無量善根故第二行發心智差別分者以無量無邊法門畢竟究竟故第三不退發心斷差別分者以入無量三昧門故第四一生補處發心果差別分者以無量神通奮迅隨意自在用故又經言復次天子初發心如取藥草方便者以攝取對治煩惱病法故第二行發心如分別藥草方便者以知對治煩惱病隨相應藥故第三不退發心如病服藥方便者以依智諸方便隨相應受用故第四一生補處發心如病得差方便者以煩惱病滅故又經

言復次天子初發心學法王家生者以降伏一切聲聞辟支佛故第二行發心學法王法者以學一切得勝處故第三不退發心能具足學法王法者以得修道勝果故第四一生補處發心學法王法能得自在者以於一切法中能得自在無障礙故
文殊師利菩薩問菩提經論卷上

文殊師利菩薩問菩提經論卷上計字七千一百個
弘法會松江信官李凌雲施刻併板紙共銀三兩一
錢九分五厘

松江信士徐爾鉉施寫銀三錢五分五厘祈

先室宋氏凡身頓淨法性恒明蓮邦不退永證菩提
信士徐洵承闕 抱香庵祖瘡對

崇禎甲申仲夏松江弘法會貴州赤水釋繼慶較識

文殊師利菩薩問菩提經論卷下

論師婆藪槃豆此云天親造
元魏三藏法師菩提留支譯

論曰已說菩薩功德勢力分次說菩薩行差別分
經曰爾時大衆中有天子名定光明主不退阿耨多
羅三藐三菩提心時定光明主天子問文殊師利法
王子言何等是諸菩薩摩訶薩畢竟略道諸菩薩摩
訶薩以是略道疾得阿耨多羅三藐三菩提文殊師
利答言天子諸菩薩摩訶薩略道有二種諸菩薩摩
訶薩以是二道疾得阿耨多羅三藐三菩提何等爲

二一者方便道二者智慧道方便者知攝善法智慧者如實知諸法智又方便者觀諸衆生智慧者離諸法智又方便者知諸法相應智慧者知諸法不相應智又方便者觀因道智慧者滅因道智

論曰法王世尊親在衆中何故乃問文殊師利以爲示現諸菩薩摩訶薩功德故此以何義以諸衆生於菩薩所起輕慢心令生尊重恭敬心故諸菩薩摩訶薩行差別有二種道何等爲二一者因清淨道二者功德清淨道因清淨道者以示現勝因清淨故彼勝因清淨者以四種發心說何等爲四一者說助清淨

道二者說功德智道三者說實際證道四者說如實修行道功德清淨道者有八種何等爲八一者攝取智教化一切衆生如經又方便者知攝善法智故二者能忍一切衆生諸不善行如經慧者如實知諸法故三者集諸白淨法如經又方便者觀一切衆生智故四者觀一切菩提分法如經慧者離諸法智故五者知諸法和合相如經又方便者知諸法相應智故六者知諸法不同相如經慧者知諸法不相應智故又慧者知諸法不相應智者以種種願故七者如實知可化衆生如經又方便者觀因道智故八者集種

種助道如經慧者滅因道智故

已說功德清淨道次說因清淨道

經曰又方便者知諸法差別智慧者知諸法無差別
智又方便者莊嚴佛土智慧者莊嚴佛土平等無差
別智又方便者入衆生諸根行智慧者不見衆生智
又方便者得至道場智慧者能證一切佛菩提法智
論曰因清淨道亦有八種何等爲八一者觀善不善
法如經又方便者知諸法差別智故二者離諸因緣
一切法根本如經慧者知諸法無差別智故三者離
一切障礙如經又方便者莊嚴佛土智故四者斷一

切和合如經慧者莊嚴佛土平等無差別智故五者
如實知如經又方便者入衆生諸根行智故六者入
一法門如經慧者不見衆生智故七者如實知一切
凡夫虛妄分別如經又方便者得至道場智故八者
證寂靜界如經慧者能證一切佛菩提法智故

經曰復次天子諸菩薩摩訶薩復有二種略道諸菩
薩摩訶薩以是二道疾得阿耨多羅三藐三菩提何
等爲二一者助道二者斷道助道者五波羅蜜斷道
者般若波羅蜜復有二種略道何等爲二一者有礙
道二者無礙道有礙道者五波羅蜜無礙道者般若

波羅蜜復有二種略道何等爲二一者有漏道二者無漏道有漏道者五波羅蜜無漏道者般若波羅蜜復有二種略道何等爲二一者有量道二者無量道有量道者取相分別無量道者不取相分別復有二種略道何等爲二一者智道二者斷道智道者謂從初地乃至七地斷道者謂從八地乃至十地
論曰復有二種略道何等爲二一者功德道二者智道功德道者集種種善根如經助道者五波羅蜜故智道者通達一切法如經斷道者般若波羅蜜故又經言復有二種略道何等爲二一者有礙道二者無

礙道有礙道者五波羅蜜者以行三界故此初地已前無礙道者般若波羅蜜者以過三界入初地證智故又經言復有二種略道何等爲二一者有漏道二者無漏道有漏道者五波羅蜜者以成就世間果故此初地已前無漏道者般若波羅蜜者以成就出世間果故此已得出世間智故又經言復有二種略道何等爲二一者有量道二者無量道有量道者取相分別者以徧取識境界故無量道者不取相分別者以過識境界不見徧取故又經言復有二種略道何等爲二一者智道二者斷道智道者謂從初地乃至

論一
七地者以如實知有爲界故斷道者謂從八地乃至十地者以如實知無爲法界故

經曰爾時會中有菩薩摩訶薩名勇修行智問文殊師利法王子言何謂菩薩摩訶薩義何謂菩薩摩訶薩智文殊師利答言善男子義名不相應智名相應勇修行智菩薩言文殊師利何謂義名不相應何謂智名相應文殊師利言善男子義名無爲彼義無有一法共相應無有一法不共相應何以故以無變無相故義者無有一法共相應無有一法不共相應以本不成就義故是故無有一法共相應無有一法不

共相應義者不移不益無有一法共相應無有一法不共相應故

論曰經言善男子義名不相應智名相應者示現實際有四種又經言善男子義名無爲彼義無有一法共相應無有一法不共相應何以故以無變無相故者以離諸無常過故是故經言義者無有一法共相應無有一法不共相應故以自體性住故如經以本不成就義故是故經言無有一法共相應無有一法不共相應故以常真如法界實體住故是故經言義者不移不益無有一法共相應無有一法不共相應

論
五
又無有一法不移不益者以法界不增不減故
經曰善男子智者名道道者心共相應非不相應善
男子以是義故智名相應非不相應復次善男子智
名斷相應是故善男子智名相應法非不相應法復
次善男子智名善觀五陰十二入十八界十二因緣
是處非處善男子以是義故智名相應非不相應
論曰經言善男子智者名道道者心共相應非不相
應者自此已下次說爲證法界有三種句六種十法
此明何義以何等智云何證爲何義何處任能證法
界以何等智者以三種句六種十法示現云何三種

句示現何等智智者謂道道者心相應法非不相應
法是故經言善男子以是義故智名相應非不相應
故又智共眷屬能證法界何以故以心清淨故道清
淨以道清淨故心清淨故又經言復次善男子智名
斷相應是故善男子智名相應法非不相應法者以
迭共依止故又經言復次善男子智名善觀五陰十
二入十八界十二因緣是處非處善男子是故智名
相應非不相應者以如實知可知境界故
已說三種句次說六種十法
初說十種智

論
六
第五

論
經曰復次善男子諸菩薩摩訶薩有十種智何等爲
十一者因智二者果智三者義智四者方便智五者
慧智六者攝智七者波羅蜜智八者大悲智九者教
化衆生智十者不著一切法智善男子是名諸菩薩
摩訶薩十種智

論曰經言諸菩薩摩訶薩有十種智何等爲十一因
智者以善知無始世來解脫種子故二果智者以如
實知無始世來種種業報故三義智者以善知自利
利他故四方便智者以能增長微小善根令無量故
五慧智者以能觀察善不善法故六攝智者以攝取

法施資生施故七波羅蜜智者以善知成就種種善
根故八大悲智者以依善根能起善行故九教化衆
生智者以善觀察時非時故十不著一切諸法智者
以離二邊修行中道故如經善男子是名諸菩薩摩
訶薩十種智

已說初十種智次說第二十種發

經曰復次善男子諸菩薩摩訶薩有十種發何等爲
十一者身發欲令一切衆生身業清淨故二者口發
欲令一切衆生口業清淨故三者意發欲令一切衆
生意業清淨故四者內發以不虛妄分別一切諸衆

論
生故五者外發以於一切衆生平等行故六者智發以具足佛智清淨故七者清淨國土發以示一切諸佛國土功德莊嚴故八者教化衆生發以知一切煩惱病藥故九者實發以成就定聚故十者無爲智滿足心發以不著一切三界故善男子是名諸菩薩摩訶薩十種發

論曰經言諸菩薩摩訶薩有十種發何等爲十一者身發欲令一切衆生身業清淨故二者口發欲令一切衆生口業清淨故三者意發欲令一切衆生意業清淨故者以爲遠離身口意業一切惡行發大精進

故四者內發以化一切衆生令學彼處故不虛妄分別一切衆生故者以不著諸法故五者外發於一切衆生平等行故者以遠離憎愛故六者智發以具足佛智清淨故者以平等教化一切衆生故七者清淨國土發以示一切佛國土功德莊嚴故者以聞慧智不顛倒求法故八者教化衆生發以知一切煩惱病藥故者以於一切法中得自在故九者實發以成就定聚故者以如實知心使隨相應說法故十者無爲智滿足心發者以證實法故不著一切三界故者以心不著虛妄法故又實不實心離虛妄取相故如經

善男子是名諸菩薩摩訶薩十種發
已說第二十種發次說第三十種行

經曰復次善男子諸菩薩摩訶薩有十種行何等爲
十一者波羅蜜行二者攝事行三者慧行四者方便
行五者大悲行六者求助慧法行七者求助智法行
八者心清淨行九者觀諸諦行十者於一切愛不愛
事不貪著行善男子是名諸菩薩摩訶薩十種行
論曰經言諸菩薩摩訶薩有十種行何等爲十一波
羅蜜行者以助菩提法滿足故二攝事行者以能教
化諸衆生故三慧行者以如實觀生滅法故四方便

行者以如實知一切法故五大悲行者以心不求證
涅槃故六求助慧法行者以爲得四無畏故七求助
智法行者以爲自然得一切法故八心清淨行者以
於一切法中無疑惑故九觀諸諦行者以入第一義
諦故十於一切愛不愛事不貪著行者如前所說離
憎愛故如經善男子是名諸菩薩摩訶薩十種行

已說何等智次說云何證第四十一種無盡觀示現
經曰復次善男子諸菩薩摩訶薩有十一種無盡觀
何等爲十一一者身無盡觀二者事無盡觀三者煩
惱無盡觀四者法無盡觀五者愛無盡觀六者見無

論
盡觀七者助道無盡觀八者取無盡觀九者不著無
盡觀十者相應無盡觀十一者道場智性無盡觀善
男子是名諸菩薩摩訶薩十一種無盡觀

論曰經言諸菩薩摩訶薩有十一種無盡觀何等爲
十一一身無盡觀者以如實觀聖非聖有爲無爲身
故二事無盡觀者以如實觀實不實義故三煩惱無
盡觀者以如實觀淨染法故四法無盡觀者以如實
觀上中下一切諸法故五愛無盡觀者以如實觀善
不善法故六見無盡觀者以如實觀顛倒不顛倒見
故七助道無盡觀者以如實觀種種門修集善根迴

向大菩提故八取無盡觀者以如實觀無邊衆生界
故九不著無盡觀者不著義如向所說十相應無盡
觀者以如實觀是義非義故十一道場智性無盡觀
者以隨衆生信示現坐道場故如經善男子是名諸
菩薩摩訶薩十一種無盡觀

已說云何證次說爲何義第五十種對治法示現

經曰復次善男子諸菩薩摩訶薩有十種對治法何
等爲十一者對治慳貪心雨布施雨故二者對治破
戒心身口意業三法清淨故三者對治瞋恚心修行
清淨大慈悲故四者對治懈怠心求諸佛法無疲倦

論
五
故五者對治不善覺觀心得禪定解脫奮迅自在故
六者對治愚癡心生助決定慧方便法故七者對治
諸煩惱心生助道法故八者對治顛倒道集實諦助
道生不顛倒道故九者對治不自在心法時非時得
自在故十者對治有我相觀諸法無我故善男子是
名諸菩薩摩訶薩十種對治法

論曰經言諸菩薩摩訶薩有十種對治法者以十波
羅蜜清淨故何等爲十一者檀波羅蜜清淨如經對
治慳貪心雨布施雨故二者尸波羅蜜清淨如經對
治破戒心身口意業三法清淨故三者羸提波羅蜜

清淨如經對治瞋恚心修行清淨大慈悲故四者毗
離耶波羅蜜清淨如經對治懈怠心求諸佛法無疲
倦故五者禪波羅蜜清淨如經對治不善覺觀心得
禪定解脫奮迅自在故六者般若波羅蜜清淨如經
對治愚癡心生助決定慧方便法故七者方便波羅
蜜清淨如經對治諸煩惱心生助道法故八者願波
羅蜜清淨如經對治顛倒道集實諦助道生不顛倒
道故九者力波羅蜜清淨如經對治不自在心法時
非時得自在故十者智波羅蜜清淨如經對治有我
相觀諸法無我故如經善男子是名諸菩薩摩訶薩

論
十種對治法故

已說爲何義次說何處任第六十種寂靜地示現
經曰復次善男子諸菩薩摩訶薩有十種寂靜地何
等爲十一者身寂靜以離三種身不善業故二者口
寂靜以清淨四種口業故三者心寂靜以離三種意
惡行故四者內寂靜以不著自身故五者外境界寂
靜以不著一切法故六者智功德寂靜以不著道故
七者勝寂靜以如實觀聖地故八者未來際寂靜以
彼岸慧助行故九者所行世事寂靜以不誑一切衆
生故十者不惜身心寂靜以大慈悲心教化一切衆

生故善男子是名諸菩薩摩訶薩十種寂靜地

論曰經言諸菩薩摩訶薩有十種寂靜地何等爲十
一者身寂靜以離三種身不善業道故二者口寂靜
以清淨四種口業故三者心寂靜以離三種意惡行
故者以三種戒善清淨故四者內寂靜以不著自身
故者以離邪我見故五者外境界寂靜以不著一切
法故者以離常無常法故六者智功德寂靜以不著
道故者以不著有物無物故七者勝寂靜以如實觀
聖地故者以不見聲聞辟支佛地如實觀察諸佛菩
薩聖地故八者未來際寂靜以彼岸慧助行故者以

遠離一切虛妄取相故九者所行世事寂靜以不誑
一切衆生故者以如實知世諦第一義諦不顛倒說
法故十者不惜身心寂靜以大慈悲心教化一切衆
生故者以爲教化衆生一切處生不疲倦故如經善
男子是名諸菩薩摩訶薩十種寂靜地
已說證法界自此已下次說諸菩薩摩訶薩隨順如
實修行義

經曰復次善男子諸菩薩摩訶薩如實修行得菩提
非不如實修行得菩提善男子云何名爲諸菩薩摩
訶薩如實修行善男子如實修行者如說能行故不

如實修行者但有言說不能如實修行故復次善男
子諸菩薩摩訶薩復有二種如實修行何等爲二一
者智如實修行道二者斷如實修行道善男子是名
諸菩薩摩訶薩二種如實修行復次善男子諸菩薩
摩訶薩復有二種如實修行何等爲二一者調伏自
身如實修行二者教化衆生如實修行善男子是名
諸菩薩摩訶薩二種如實修行復次善男子諸菩薩
摩訶薩復有二種如實修行何等爲二一者功用智
如實修行二者無功用智如實修行善男子是名諸
菩薩摩訶薩二種如實修行復次善男子諸菩薩摩

論
菩薩復有二種如實修行何等爲二一者善知別分
諸地如實修行二者善知諸地無差別方便如實修
行善男子是名諸菩薩摩訶薩二種如實修行復次
善男子諸菩薩摩訶薩復有二種如實修行何等爲
二一者離諸地過如實修行二者善知地地轉方便
如實修行善男子是名諸菩薩摩訶薩二種如實修
行復次善男子諸菩薩摩訶薩復有二種如實修行
何等爲二一者能說聲聞辟支佛地如實修行二者
善知佛菩提不退轉方便如實修行善男子是名諸
菩薩摩訶薩二種如實修行

論曰經言復次善男子諸菩薩摩訶薩如實修行得
菩提非不如實修行得菩提善男子云何名爲諸菩
薩摩訶薩如實修行如實修行者如說能行故不如
實修行者但有言說不能如實修行故者以如所說
如是修行以不違先言故又經言復次善男子諸菩
薩摩訶薩復有二種如實修行何等爲二一者智如
實修行道二者斷如實修行道善男子是名諸菩薩
摩訶薩二種如實修行者以如實智證聲聞辟支佛
智而不取彼處以爲究竟故又經言復次善男子諸
菩薩摩訶薩復有二種如實修行何等爲二一者調

論
伏自身如實修行者以自取妙道如實修行故二者
教化衆生如實修行者以化餘衆生令入正道如實
說法故如經善男子是名諸菩薩摩訶薩二種如實
修行故又經言復次善男子諸菩薩摩訶薩復有二
種如實修行何等爲二一者功用智如實修行者以
作心行菩薩行功用智故二者無功用心行菩薩行
行者菩薩於修道中任以無作心行菩薩行無功用
行智故如經善男子是名諸菩薩摩訶薩二種如實
修行故又經言復次善男子諸菩薩摩訶薩復有二
種如實修行何等爲二一者善知分別諸地如實修

行者以善智慧方便故二者善知諸地無差別方便
如實修行者以入一相故如經善男子是名諸菩薩
摩訶薩二種如實修行故又經言復次善男子諸菩
薩摩訶薩復有二種如實修行何等爲二一者離諸
地過如實修行者以離二邊故二者善知地地轉方
便如實修行者以修行善法不休息精進故如經善
男子是名諸菩薩摩訶薩二種如實修行故又經言
復次善男子諸菩薩摩訶薩復有二種如實修行何
等爲二一者能說聲聞辟支佛地如實修行者以善
知一切法故二者善知佛菩提不退轉方便如實修

行者以證真如法如實知修行方便故如經善男子
是名諸菩薩摩訶薩二種如實修行

經曰善男子諸菩薩摩訶薩有如是等無量無邊如
實修行諸菩薩摩訶薩應如是學如實修行諸菩薩
摩訶薩若能如是如實修行者速得阿耨多羅三藐
三菩提不以爲難

論曰修行四種勝因成就四種勝果及餘如實修行
故彼勝果者謂如來智於一念中知三世事皆相應
故

經曰爾時佛讚文殊師利法王子言善哉善哉文殊

師利汝今善能爲諸菩薩摩訶薩說本業道識如汝
所說

論曰善哉者以不顛倒說法故隨順如來所說法故
經曰說是法時十千菩薩得無生法忍文殊師利法
王子等一切世間天人阿修羅等聞佛所說皆大歡
喜信受奉行

論曰有三種義是故歡喜何等爲三一說者清淨以
於諸法得自在故二所說法得清淨以如實證知清
淨法體故三依所說法得果清淨以得淨妙境界故
如經皆大歡喜信受奉行故

文殊師利菩薩問菩提經論卷下

較論

十四紙十二行令南作今

文殊師利菩薩問菩提經論卷下計字六千零六十個

弘法會松江信官李凌雲施刻併板紙共銀二兩七

錢二分七厘

松江信士徐爾鉉施寫銀三錢零三厘所

先室宋氏凡身頓淨法性恒明蓮邦不退永證菩提

信士徐海承聞 抱香庵祖璿對

崇禎甲申仲夏松江弘法會貴州赤水釋繼慶較



三八三